


AB



ov

llin

932



Bedencks Ende.





L. 89,

Den Durchlauchtigisten /
hochgebornen Fürstin vnd Frew-
lin Anna Mariae vnd Sophia / geborne
Marggrefsin zu Brandenburgt / in Preussen / zu
Stettin in Pomern / der Cassuben vnd wenden /
auch zu Crossen in Schlesien Hertzoginen /
Burggrefsinen zu Nürnberg / vnd
Fürstin zu Rügen / etc. meinen
gnedigsten Frewlin /

Wünsch ich Andreas Musculus Gots
tes gnad / Fried vnd Segen / sampt
zeitlicher vnd ewiger wolfsart
zuuorn / etc.

S ist ein alt vnd gebreuchlich
sprichwort / Væ terræ in qua
fiunt prodigia, wee dem Land
in welchem wunder vnd zeis-
chen geschehen / darumb aber wehe / vnd
oberwehe / das solche leuth / welche Gott
neben dem wort / auch mit Wunder vnd
Zeichen / als vorboten seines gefasten zors
nes / von wegen irer sünde vnd missethat /
zur buß / besserung / vnd abwendung seiner
straff / will bewegen vnd verursachen / in
verachtung vnd mutwilliger hindanses-
ung

A ij ung

ung des Worts/ vnd aller mit beyfelligem
zeichen/ Gottes gütigkeit/ langmütigkeit/
vnd lindigkeit/wie Paulus sagt/ Rom. 2.
mißbrauchen / inn irem sündlichen vnd
sirefflichen leben beharren/darinnen ver-
harten/ja auch noch sündhafftiger werdē/
vñ für vnd für immer vbel erger machen/
grössern zorn/straff vnd vnglück heuffen/
vnd auff sich laden.

Wie denn solch sprichwort/ Væ
terra, als warhafftig/ immer seinen fort-
gang gehabt hat von der Sindflut/ So-
doma vnd Gomorra/ vnwandelbar / für
vnd für/ in allen Königreichen/ Landen/
vnd Stedten/bis auff diesen heutigen tag/
allein die lieben fromen Ninuiter/in dem
ausgenommen/welche auch aussershalb vor-
gehender zorn Zeichen/ auff die blosser buß
predig des Propheten Jonæ/ sich zur buß
haben lassen bewegen/vnd angekündigten
zorn vnd straff Gottes / von sich abge-
wendet.

Ferner aber/ ist das auch war / aus
bezeugung aller historien / bey Christen
vnd vnchristen/ das alzeit grosser zorn
vnd

vnd straff erfolget/ auff grösser vnd viel-
faltiger vorhergehende zeichen/ Vnd
darumb aus gewisser vnd vnbetrieglicher
langer erfahrung/ auch diß sprichwort hies
raus erwachsen/ Groß vnd viel zeichen/
Groß vnd viel vnglück/etc.

Entlichen ist das auch inn langer vnd
steter erfahrung bezeuget vnd bestetiget/
das gedrowete / angekündigte straff /
durchs Wort / vnd beilauffenden zorn
zeichen/ als dann allererst gewiß erfolget/
wenn die leute / in grosser langmütigkeit
Gottes / vnd lauffziehung seines zorns/
am sichersten gewesen/ sich nichts weni-
gers/ als vnglück vnd vnfalls/ vermutet/
vnd weil auff angekündigten zorn/ nicht
balde die straff erfolget/ in dem won/ sinne
vnd gedanken blieben vnd beharret/ was
sich in die lenge verziehe/ müsse darumb
gar nach bleiben/ vnd daraus nu auch/ ein
gewiß vnd warhafftiges sprichwort wor-
den: Heissem Sonnen schein/ folget ge-
wis vngewitter / wenn der Himmel am
schönsten vnd am aller fleresten ist/ erhebe
A iij sich

sich bald vnd plöcklich/eine grosse schwarze vnd finstere wolcken/ mit grossen vnd erschrecklichem folgendem hagel/ bliken/ vnd donnern/ Wenn das Meer am stillsten ist/ so kompt gewiß vngestümigkeit/ vnd gewisser schiffbruch/ Die alten bau- felligen heuser fallen nicht ein/ in grossen winden/ sondern wenn es gar still ist/ vnd die Sonn am heissesten scheint. *Lento gradu ad uindictam diuina procedit ira,* haben auch die Heiden vorzeiten gesagt/ Gott straff nicht bald wenn er im Wore dreuhet/ vnd mit wunder vnd zeichen/ seinen zorn ankündiget/ sondern wenn alles fürüber/wenn es allenthalben still / *Cum dige- runt pax & securitas,* sagt auch der liebe Paulus/wenn man sichs am wenigsten fürchtet vnd vermutet/ *Tunc repentinus imminet interitus,* Als dann ist das vnglück am gewissen/am nechsten / vnd plaket vnuersehens/dick vnd heuffig/ vber einen hauffen rein/ wie diß in sonderheit bezeugen vnd bestetigen (alle andere historien vnd erschreckliche vielfaldige exempel hindangesezt) drey in der heiligen
Schrifft

Schriſſe ſonderlich gemelt/plöcklich einfal-
lenden ſtraffe vnd zorn/ 1. Vber die erſte
Welt mit der ſindflut: 2. Vber Sodoma
vnd Gomorra. 3. Im Neuen Teſtament/
vber Jeruſalem vnd vber das ganze Judi-
ſche Königreich.

Dieſe drey ſprichwörter / wollen nu
auch vnd ſonderlich bey vns deutſchen/
als den Gott ſein wort/ zur buß vnd ver-
gebung der ſunden / geben/vnd neben dem
Wort/ mit heuffigen vnd vielen wunders-
zeichen/darzu locket/ reizet/ vnd verurſa-
chet/ war vnd vberwar werden/ vnd das
unglück plöcklich vnd heuffig vber vns
bringen/welches wir vns jekunder am we-
niſten beſorgen/vermuten vnd fürchten.

Erſtlich Væ terræ, wee Deutſche
land/ in welchem die Leuthe/ durch das
jezt gepredigte Wort/ in ſolchem ſchein
vnd klarheit als von der Apoſtel zeit an
nicht geſchehen/ zur buß / zur vergebung
der ſunden/ zur auffhebung aller woluers-
dinter ſtraff vnd zorn Gottes/zur groſſen
herrſchender oberfließender/ vnd vber alle
maß vbertreffende gnad/wie Paulus ſagt

A . iiii . vnd

vnd entlich ewiger seligkeit/geleitet vnd ges-
furet werden/vnd neben dem wort mit so
viel zeichen am Himel / Elementen auff
Erden/vnd an allen creaturen/als zuvor
so vielfaldig vnd heuffig nicht geschehen/
weil die welt gestanden / Gott seinen zorn
vnd straff offenbaret/aber in die lenge auf-
helt/ vnd vnser besserung wartet/ vns lie-
ber leben vnd seligkeit zu geben vnd zu-
schencken/als jamer/not/elend/verderben/
thod vnd ewig verdammnis.

Ist deswegen diß sprichwort / Væ terræ,
alzeit war gewesen vnd blieben / wird es
sich nu in diesen vnsern letzten/vnd aller
ergsten zeitten/auch nicht endern vnd vn-
warhafftig machen / sondern sein End
viel mehr/mit warheit beschliessen vnd
vollenden/vnd das als der gewisser vnd
warhafftiger / das wir weniger als zuvor
irgent im volck ans wort vnd zeichen vns
wenden vnd keren.

Für das ander aber/ müssen wir das
auch bekennen vnd sagen/ das zuvor von
anfang der Welt / bis auff diese vnser
letzte zeit / grösser / erschrecklicher / auch
mehr vnd heuffiger / vnd zuvor niemals
erhörte/

erhörte wunder vnd wunderwerck geschehen/ vnd wann man alle zeichen vnd prodigia/ aus allen scribenten vnd geschichtschreibern/ so viel der von anfang allenthalben/ vnd an allen orten geschehen/ vnd beschriben sind worden/ zu samfasset/ vber treffen diese wunder vnd wunderzeichen in ihrer grosheit/menge/ vnd anzal die selbigen weit vnd fern/ welche innerhalb 20 jharen/ vnd sonderlich bey vns deutschen allenthalben / warhafftig sind gesehen worden/ vnd darumb gros zeichen gewies gross vnglück/ vnd viel wunder/viel wunder straff vnd vnglück mit sich bringen werden/was zuuor alzeit war/das wirdt auch nach war sein vnd bleiben / daran wird nichts hindern nach endern/vnnsere deutschen grosse sicherheit vnd verachtung/beide des worts vnd der zeichen/ vnd wird geschehen vñ erfüllet werdē/was der herr Christus/von disen letzten zeitenn hat prophezeit. Erit sicut in diebus Noæ: Non cognouerunt donec. das wir weniger/als die Leute in der Sindflut vnd zu Sodama vñ Gomora vnser vnglück / Gottes gerechten zorn vnd straff werden

A v in acht

in acht haben / vnd nicht eher erkennen als
wen vns plözlich / ein vngluck / ein straff
nach der andere / wird vberfallen vnd vber-
raschen.

Zum dritten / als war als es ist / vnd
aus langer erfahrung kunt vnd offenbar /
das gemeiniglich die grösten vnd aller vn-
gestumbsten wetter / plözlich sich erheben /
nach grossen hitzigen Sonne schein / das
Meer als dan am vngestumbsten wird / wen
es zuvor am aller stilsten gewesen / Vnd
alte heusser im grossen winde stehen / aber
wen es am stilsten ist / als dan einfallen /
Cum digerit pax & securitas, wen man
meinet es habe kein not / so gehet die not als
terst an / Also wird nu in diessen vnsern lez-
ten zeiten / auch warhafftig / die lange im
wort angekündigte straff / Gottes zorn
vnd gros vngluck / auch durch so vilfeldige
zeichen vnd wunder angezeiget / nu fur der
thur sein müssen / wo nicht albereit in irem
anfang vnd erfüllung / weil wir deutschen
vnter solchen predigen / drawen vñ schreckē
vnder so viel vnd vnerhörten zeichen / nu so
gar still sein / nichtest weniger als vngluck /
vns

uns befahren/ vnd mit seen planken/bawen
en/ feuffen vnd verkauffen/der massen nu
uns in die welt schicken/als were nu allerst
diwelt in irer besten blüe/ glück vud woll-
fart/vnd ist die welt von anfang biez auff
diesse zeit/ wie Johannes sagt/ nichts als
Concupiscentia Carnis/Oculorum/vnd
Fastus uitæ. Lust des fleisches/lust der aus-
gen vnd hoffart des lebens geweesn/müs-
sen wir selber von uns war sagen vnd bes-
kennen/das zuuor alle hantirung narung/
handlung/ pracht / hoffart/vnd obermut/
bey vnsern voreltern lauter poppenwerck
vnd kinderspiel gewesen / gegen diesen ihs-
igen geschwinden betrieglichen handel vñ
wandel/finanzeren/wucher/ betrigen/vnd
verfortheilen / gegen der jekt herschen-
der sorgfeldigkeit der Narung / gegen der
ihigen/weil die welt gestanden/onerhörten
hoffart vnd pracht/ welcher daraus allein
entspringt vnd herkompt / das nu mehr
in den Sin/wan vnd gedanken komen
sind/in disen letzten tagen/die meisten bestē
vnd grōsten Leuthe / dass nie weniger not
vnd gefar gehabt als eben nu / vnd nie bes-
ser zu leben als ihsunder /vnd darumb sich
auch

auch jederman also nu in die welt schicket/
als zuuor nie geschehen/ vnd zwar Chris-
tus vnd sein heiliger Apostel Paulus/has-
ben also Deutschland in sonderheit abges-
malet wi es ihunder ist vñ stehet/ Nie mag
sich verwundern / were sich verwundern
kan/wie doch eben wir deutschen in solche
thorheit vnd blindtheit geraten / das wir
mit hörenden Oren nicht hören/ alles das
was vns ihiger zeit im gepredigten wort
allenthalben wird angekündiget/von der
Menschen letzten vnd grösten bosheit vñ
sicherheit vorm end der welt/von grossen
vorgehenden vnglück/vnd entlich von der
zukunfft des Sons Gottes zum Gericht/
Vnd also auch mit sehenden augen nicht
sehen/die erschreckliche vielfaldige zeichen
vnd wunderwerck / Wir haben doch noch
dieses Jar für wenig wochen den Herrn
Christum am Himmel gesehen in maßen
vnd gestalt/wie er am Creuz gehangen/vñ
zuuor auch in kurzen vergangenen jaren
also vnd der gestalt am Himmel gesehen/wie
er zum Gericht komen wird. Vnd ist ges-
wies vnd vber gewies / daß eben solche
erscheinung

erscheinung Christi diß zeichen ist / dauon
er selber weissaget / Matt: am 24 Cap:
wenn alle zeichen von im vermeldet / fürs
über vnd erfüllet / das sich lezlich am Him
mel werde sehen lassen Signū fili hominis
das zeichen des Menschen Sons / Tunc
apparebit: Tunc uidebunt uenientē, bald
darauff / werde man in selber in wolcken
komen sehen / vnd des wegen / es also deute
vnd auslege / das dieß zeichen sey / so für
seiner zukunft sol gesehen werden / diese obs
en gemelte erscheinung / ettlich mal in kurz
en Jaren / am Himmel gesehen / damit er ja
zuuerstehen vnd abzunemen / sichtbarlich
für die augen der Menschen darstelllet / das
er sich albereit zu seiner lezten zukunfft /
fertig gemacht / vnd bald folgent / seinen
außzug vom Himmel rab wolle nemen / zu
richten die lebendigen vnd die Thotten /
Aber dieß alles / mus nichts sein / nichts
helffen / zur warnung vnd wartung / auff
den grossen vnd erschrecklichen tag des
Hern / zeichen hin zeichen her / es ist ausge
zeichnet / blindt sein wir / blindt bleiben wir /
vñ sehen mit sehenden augē / weder zeichen
noch wunz

noch wunder/wer blindt ist der sihet nicht/
man redet / man schreibet / man singet
von solchen vnd der gleichen zeichen/man
malet sie auff pappir/man drücket sie/vnd
macht sie jederman kunt vnd offenbar/
Aber es gilt vns eins so viel als das ander/
wir seen/pflanzen/bawen/keuffen verkeuf
fen / treiben alle geschwinde rencke vnd
finantzerey/alle büberei/ vnd bubenstück/
sind ersoffen in hoffart vnd pracht/ all
vnsere thun vnd wesen / ist auff fressen/
sauffen/ vnd sorgfeligkeit der narung ge
richtet / wir machen vns eine newe vnd
lenger werdende welt/darinen nu zum besten
zu sein vnd zu leben / es gefall Gott oder
nicht / er thue auch darbey was er wil / da
wider hilfft weder predigen/sagē / schreien
noch warnen.

Wolan ich habe das meine / nach
erforderung meines beruffs gethan / vnd
in etlichen aus gegangenen gedruckten
büchlein/fast zu viel vnd zu offft/von diesen
szunder furfallenden/geferlichen/ vnd lez
ten zeiten / geschrieben / vnd kan in dem /
meinen Geist noch nicht auff halten/vnd
mich selber

mich selber bey mir selber verwundere/das
ich meine gedancken / vor furcht vnd bes-
sorg/grosses bald zukünfftigen vnglucks
vñ zukünfft des Herrn zu Gericht nicht kon-
abwenden/ vnd habe nu vber alles / was
ich zu trewer warnung zuuor geschrieben/
auch dieses spruchs Jesus Syrach erkler-
rung fur mich genomen / ferner darauss
fromme Christen / der zunahenden bösen
vnd geferlichen tagen/zu erinnern in wa-
reß bussfertigeß leben/Gottes furcht /vnd
lieb / hoffnung vnd wartung der ewigen
seligkeit sich zu begeben.

Weil aber E. Churf. G. ihr diese
geferliche zeite / auch mit Christlichen
gemütte vnd gedancken /lassen angelegen
sein/vnd fur wenig tagen /ir Christlich ge-
sprech vñ beredung mit mir hate/von dem
Jüngsten tage / das der selbige nicht weit /
sondern immer zugewartten /vñ wer von
Gott dazu begnadet / sich wol in der zeit
zur seligen wartung auff die erscheinung
vnd zukünfft des grossen Gottes / vnser
Herrn vnd Heylands/möge mit wachen
vnd beten bereit vnd fertig machen/ habe
ich mich

ich mir E. Churf. G. solche rede vnd ge-
dancken als Christlich vnd rhümlich/wol
gefallen lassen/vnd darumb auch zu meh-
rer solcher Christlicher andacht zubewegē/
dieses büchlein E. Churf. G. Freulein zu
ehren/mit meldung ewer J. G. Namens/
lassen in druck ausgehē/den E. Churf. G.
selbst habe ich diese meine geringe Arbeit
nicht dörffen zuschreiben / weil das büch-
lein zu klein vnd zugerung / verhoffe aber
E. Churf. G. werden ir solch mein
vornemen/in gnaden lassen wolgefallen/
vnd solch büchlein neben E. Churf. G.
Freulin mit gnad gunst vñ lieb annemen/
vnd befele hiemit E. Churf. G. sampt E.
Churf. G. Herrn vñ gemahl/der Jungen
herrschafft vnd Freulin/in Gottes gnad
schutz vnd schirmung zur ewigen
seligkeit Amen. Geben Franck-
furt an der Oder
am tage Mats
thia 72.

ECCLE. 7.

*In omnibus operibus tuis memo-
rare nouissima tua, & in æter-
num non peccabis.*

Dieser wort Jesus Syrach
erklerung / zu trewer verma-
nung vnd warnung / wider
die grosse / vnd als nu mehr
in den letzten zeiten / die allergröste vnd
verdamlische sicherheit / rhohes / freche-
es / vnd vngötliches lebens / wollen wir
teilen in diese zwey stück.

Erstlich melden vnd anzeigen /
was da heissen die Nouissima / die letzten
dinge / oder das End zubedencken / wie
solchs Christlich / nutzbarlich / vnd selig-
lich soll geschehen vnd furgenomen wer-
den / vnd viererley Nouissima / oder letzte
vnd Entliche dinge / darauff aller Gots
tes kinder / so nicht zugleich / mit der sich-
eren vnd frechen welt / wollen verlorn
vnd verdampft werden / hertzen / Sin vñ
gedancken sollen gericht / vnd gewendet
sein. Zum andern / wie das zuworste-
hen das

B

hen das

hen das Jesus Syrach sagt / wer diese
Nouissima / oder das end bedencke / nim
mermehr werde sundigen / so doch alle
heiligen / wie from / Gottfurchtig / vnd
in fleissiger guter betrachtung / der letz-
ten dinge sie leben vnd sterben / sundigen
vnd sunder sind / vnd allein in steter ver-
gebung / von teglicher abwaschung irer
sunden im blut Christi gerecht / from / se-
lig sein vnd bleiben / wie David solchs
bezeuget im 33 psalm.

Erstlich / heissen das Nouissima,
vnd sind die letzten ding oder das End /
welches alle Gottes Kinder sollen bes-
dencken / stets fur augen haben / vñ nicht
eins aus den gedancken vnd sinne kom-
men lassen / als nemlich / das wissen vnd
stets bedencken / das dieß zeitlich leben /
sein End habe vnd neme / wie Moses
sagt in seinem psalm / welcher im Psal-
ter ist der 90 / vñ einen jzlichen menschen
sein ziel vnd zeit / wie Job sagt / seine
nes lebens gesezet / welche nicht zuuers-
lengern / wen einem jzlichen menschen /
sein genentes vnd angesetztes stündlein
kompt / so mus er auffbinden vnd wand-
ern / do ist keins lenger bleibens / Kaiser
König /

König/burger/bawr/ vnd Kosseth mus
zugleich fort / Posuisti terminos eius.
Contra uim mortis. Pallida mors æquo
pede pulsât, do ist danken an verlorn/
hie hilfft vnd erret keiner den andern/
wen der thot auff fordert der mus fort/
der thot ist gewies / aber die stunde vnd
zeit vngewies / ein starcker frischer vnd
gesunder fellet ia so bald / als ein schwach
cher/ein Junger frischer mensch/stirbet
ia so bald als ein Alter vnd Francker/wie
den diß sprichwort / aus langer vnd ges
wieser erfahrung / do her erwachsen / das
man sagt / Es komen ia so viel kelber /
als Ochsen heut zum marck / vnd das
rum auch bald im anfang / nach dem sal
vnd Erbsunde / Got selber den Ersten
vatter aller menschen Adam / des thots
Memorial vnd gedencf zettel / an hals
hat gehenget / das er vnd alle die seine / ia
den thot nicht zu rugk setze / sondern des
Endes / vnd absterben von diesem leben /
sich erinnere / do er zu im sagt Gene: 2 ca.
du bist Erden vnd solt wider zu Erden
werden.

Diese Memorial / renouiret vnd
erneuert der Man Gottes Moses / wie

B ij es mit

es mit aller menschen/vñ Adam anfeng-
lich/thödlichen abgang vnd absterben/
bics auff seine zeit / viel hundert jar bes-
prefftiget vnd bestetiget / vnd machet
ein schön vnd Geistreiches lied von dies-
sen beschlossenen vnd vnwandelbaren
Sententz vnd vrtheil Gottes / das sein
volck/im vō Gott vbergeben/aus Egip-
ten ins gelobte Land zu führen / solchs
Liedlin teglich sollen singen/vnd sich der
Nouissima, der letzten ding / oder des
Endes erinnern/vñ spricht im 90 psal.
Hie lese man den 90. Psalm gar aus.

Im 89. psalm/werden alle menschen
en Kinder / dieses Memorials auch erins-
nert mit diesen wortten: Quis uiuet, et
non uidebit mortem, wer ist der do lebet/
vnd den thot nicht sehe/der seine Seele
errette aus der Helle hand.

Im 39 psalm erinnert sich Dauid
auch dieses angebornes Memorials/vnd
spricht:

Ach herr/lerre mich doch/das ein
End mit mir haben mus / vnd mein les-
ben ein ziel hat/vnd ich dauon mus/sihe
meine tage sind einer hand breit bey dir/
vnd

vnd mein leben ist nichts fur dir / wie
gar nichts sind alle Menschen / die doch
so sicher leben / sie gehen daher wie ein
schemen vnd machen inen viel vergeb-
licher Arbeit / sie samlen vnd wiessen
nicht wer es kriegen wird.

Vnd auch Jesus Syrach / daraus
dieser spruch / den wir zu erkleren fur
vns genommen / dieses gedencf zettels erz-
innert alle Adams Kinder / im 14 cap:
vnd spricht. Gedencfe das der thodt
nicht seumet / vnd du weist ia wol / was
du fur einen bund mit dem todt hast.

Ja auch die Heiden / ausserhalb
Gottes wort / solchen angeerbten ged-
encf zettel / von Adam auff alle mēsch-
en / auch am hals hingend behalten /
vnd darumb des thods / vnd des sterba-
lichen wesens aller Menschen gedechtz-
nis auch bey inen bliben / vnd nicht viel
geringer vnd weniger / als die heilige
schriefft / vom thodt / von der sterblich-
keit der mēschen / vō vngewieser zeit vñ
stunde des todes / geredt vnd geschriebē
haben / wie solches nach der lenge aus
ihrer schriefft vnd buchern zu erweisen.

Vnd auch aus solchen / vnuergeß-
lichen

B iij lichen

lichen Memorial / des erschrecklichen
vnd abscheulichen thods (wie denn
auch ir Höchster vnd weisester Meis-
ter vnd Lerer sagt Aristoteles, Omni-
um terribiliū terribilissima est mors, das
vnter allen erschrecklichē dingē / nichts
den Menschen erschrecklicher fürfalle/
als der thodt) etliche Heidnische völk-
er / diese gewonheit vnd gebrauch ge-
habt / des thodes bildnus / an alle heüf-
ser / vnd wende zuschreiben / vnd auch
in iren wolleben / frölich zusamtkunfften
vnd Gasterein / des Adams Memorial /
vñ des thodes gedechtnis / sich zu erin-
nern / auch der vernunfft nach / wol vnd
weislich haben gethan / in dem / das sie
ein formirtes vnd geschnitztes thodes
bilde / mitten vnter die geste / wan die
freude vnd wolleben am besten gewe-
sen / haben lassen tragen / vnd durch
solch abscheulich gebilde / ire freude also
zu messigen / das sie dennoch zugleich
mit gedechten / aller menschen gelegen-
heit / wie sie heut frölich / morgen trau-
rig / heut gesundt / morgen krank vnd
thodt sein möchten.

Also liest man auch in der historien
das aus

Das aus angeerbtem Memorial/ vnd
Adams gedencf zettel / etliche Könige
vnd mechtige potentatē/ damit sie sich
jrer gewalt vnd macht/ nicht zu seer er-
hüben/ vnd gedechten/ das sie dennach
auch nicht mehr/ als sterbliche Mensch-
en/ durch einen dazu verordnet vnd be-
stellet/ haben des tags vñ des Nachts /
ein mal lassen inen zu schreien/ Memen-
to mori, Gedencf das du sterblich / vñ
der mal eins auch sterben must.

Wie dan im Andern buch der
Könige am 14. Cap: wird gemelt/ das
ein weib/ von Joab/ darzu abgericht/
Absolon / seinen Vater David wider
zuersonen / damit sie inen zur gnad vñ
güte/ in seiner Königlichen hoheit als
der leichter möchte bewegen/ dē König
David/ auch dises Memorials erinnert
vnd spricht: Ach lieber herr König Om-
nes morimur, Ob Absolon grosses ver-
schuldet/ vñ vileicht den thod verwirck-
et/ was ist dem König mit seines Sons
thod beholffen/ wir sind ja alle sterblich
müssen auch alle sterben / vnd komen
vnter die Erden / wie ein wasser nein
sincket/ vnd kompt nicht wider herfur.

B üij

Man

Man sagt/das dieser gebrauch /
Adams gedencf zettel sich zu erinnern/
auch an des heiligen Vaters hoffe zu
Rom gehalten werde / Damit er in sei-
ner vber menschlichen Heiligkeit / als
ein irdischer Godt / vnd Gottes Stads
halter / gleichwol auch nicht vergesse/
das er nicht mehr / als ein sterblicher
Menschen / vnd ob ihm / Kayser vnd
Könige die fusse kussen / der thodt im
darumb nicht ein fuffalle thun werde /
sich auch für im demütigen / vnd seinen
bogen / mit seinen thödlichen pfeilen/
auff in nicht spannen vnd schiessen/
auch durch darzu verordente person /
sich des thodes laß erinnern / vnd in
seiner hochheit vnd vbermenschlicher
ehr vnd ehrerpitüg / sich sterblich wisse.

Der fromme vñ geduldige Job /
erinnert sich auch dieses seines anges
bornen gedencf zettels vnd spricht / in
seinen höchsten Engsten vnd thods nö-
ten / am 1 4 Cap: Der Mensch von weib
geborn / lebt kurze zeit / vnd ist voll uns
ruhe / gehet auff wie ein blume / vnd felz
let abe fleucht wie ein schaten / vnd bleib
bet nicht / vnd du thust deine augen v-
ber solchen

er solchen auff/das du mich fur dir ins
Gericht zeuhest/ wer wil einen reinen
finden/bey denen/da keiner rein ist.

Er hat seine bestimpte zeit /die
zal seiner Monden stehet bey dir / du
hast im ziel gesetzt/ die wird er nicht ver-
bergehen. Vnd bald hernach sagt er fern-
er/ Wo ist ein Mensch/ wenn er thod
vnd umb komen/vnd dohin ist: wie ein
wasser auslaufft / aus dem See / vnd
wie ein Stram versieget vnd vertrock-
net/ So ist ein Mensch/ wen er sich legt
vnd wird nicht auffstehen / vnd wird
nicht auffwachen / so lang der Himmel
bleibt/ noch von seinem schlaff erweckt
werden.

Das sind nun Zum Ersten die
Nouissima, die letzten ding vnd das
End / welches alle Gottes Kinder
stets sollen fur augen haben/vnd dies /
von jrē ersten Vater auff sie angeerbet/
Memorial vnd gedencf zettel / nicht
eins aus ihren sin vnd gedanken kom-
men lassen/vnd mit Mose teglich sage
vnd biten: Ach herr lere vns bedencken/
das wir sterben musen / auff das wir
flug werden.

B v

Weil

Weil aber solch bedencen / des
Endes vnd des thodes Memorial zete-
tel / das bey sterblichen leuten schaffet
vnd ausrichtet / das sie klug werden / vñ
fursichtiglich in Gottes furcht leben /
fur sünden vnd Gottes zorn sich hüt-
ten / nicht frech / sicher / vnd Gottlos
werden / wie Moses obē gemeldet / Lest
der Erbfeind aller Menschen / der welt
Gott / Furst vnd Regent der finsternis /
(wie in Paulus nent / Eph. 6.) In dem
seine liste / betrug / gewalt vnd macht ses-
hen / was er bey dem Menschen / in dem
fall kan erhalten / thun / vnd ausrichtē
Vnd weil er ein furst vnd herr des tho-
des ist / wie im diese Herrschafft also
giebt vnd zueigent / die Epist: zum Heb:
am 2 Cap: vnd wie er den thodt hat in
die welt / vñ vber alle Menschē bracht /
auch dohin arbeit / all sein thun vnd für-
nemen dohin richtet vnd wendet / das
die leutte / den thod weit aus den augen
setzen / aus dem Sin vnd gedancken
schlagen / dermassen / als were gar kein
thodt / vnd also alle menschen Kinder /
mit vergessenheit / vnd hindansetzung
des thodes / zur sicherheit / vnd bösem
Gottlosen leben zu bringen vnd zuuer-

ursachen/damit sie aus diesem zeitliche
thodt/ auch in den ewigen thod geratē
vnd komen/vñ mit jm im ewigen thod
vnd verdammis bleiben müssen.

Vnd in diesem / brauchet er als
ein listiger Tausent Künstler / zwey
meister stück/ Ein mal/das er mit seys
ner list/vnd geschwinden betrug/ einen
sterblichen menschen/welcher doch den
thodt / alle stund vnd tage / fur augen
hat/mitten im leben/mittē im thodt ist/
vnd lebt also sicher/vnd des thodes gar
vorgeslich machen kan/das er nicht als
lein an keinenthod vñ sterben gedenckt/
sondern in den wan/vñ Teufflischen be
trug kömpt/als wolle er ewig leben/vñ
nimer mehr sterben/ vnd darumb auch
solche leut/vom Teuffel so betrogen vñ
verblent/all jr gedancken/thun vnd für
haben/allein auff dis zeitlich leben wen
dē/mit solcher lust des fleisches/lust der
augen/vnd hoffart des lebens/wie Joz
hannes sagt/gantz vnd gar ein genom
men/sich also in diese welt / vnd welt
leben schicken / der massen mit sorgfels
digkeit der Narung/mit geitzen/wuch
ern/ betrigen / feryorthailen / schaben
vnd kragen

vnd kratzen / sich einlassen als wolten
vnd solten sie ewig hie bleiben vnd le-
ben.

Von solchen verblenden leuten
redet David im ganzen 37 psalm durch
aus / wem es geliebet / der lese den psalm.

Vnd Christus stellet auch den seis-
nen ein exemplar dieser welt leute fur im
Reichē Manne Luce. am 16 vnd am 12
Cap: von dem Reichen man / der seine
scheine abbrechen vnd grösser wolt
machen vnd saget zu seiner Seele / liebe
Seele du hast einen grossen vorrat auff
viel Jar / habe nun ruge / is vnd trinck /
vnd habe guten mut.

Es bezeigen auch die Historien
bey den Griechen vnd Römern / das
der Sathan / des thodes Oberherr / der
Massen vnd gestalt / den thodt aus den
augen vnd gedechtnis gesezet habe / etz-
licher grossen vnd mechtigen Königen
vnd Kaisern / das sie in erhebung irer
hohheit / zeitliches glucks vnd wolffart /
sich nicht fur Menschen / sondern fur
Götter haben gehalten / als Götter ha-
bē wollen geehret vnd angebetten wer-
den / auch Göttliche erzeigte Ehre an-
genommen /

genommen/vnd entlich auch fur vnsterbs
lich sich geachtet. Aber schentlich vom
Teuffel betrogen/ bald folgents in ver
wandlung des glucks/ in grossen vn
gluck/ vnfal/ Jammer vnd Elend/
Jemmerlich sind ombkomen/sterblich
zu asch/staub vnd Erden worden/ vnd
entlich Adams Memorial vnd gedencf
Zetel/sich nit haben können entbrechen
das sie Erden vnd wider zu Erden
werdē/ wie solchs in etlichē jemmerlichen
Historien vnd exempeln nach der lenge
were zu erweisen/ Wollen nur eines ge
dencken / als nemlich des grossen Kö
nigs Alexandri/ bey den Griechen/do er
sich seines grossen glucks erhoben/vnd
auch aller Menschlicher sterblichkeit
hatte vergessen/in Teufflischen betrug
in den wan vnd vermessenheit komen/
das er ein Gott vnd nicht allein ein
mensch were / auch Göttliche Ehr im
liess anbiten / do er aber im 12. Jar
seiner großglückseligen Regierung / sei
nes Alters nach nicht viel vber dreißig
Jar war/Jemmerlich ombkame / vnd
seine Mutter/bies auff den dritten tage
vnbegraben / inen sache auff Erden
stinctend

stinkend vñ vbelrichend liegen/sprach
sie mit grossen Jammer/O Son lieber
Son/nu sihet man was du fur ein Got
bist gewesen.

Ach Gott von Himmel/wie arme
leute sind wir / wie ein arme Creatur /
sagt David im psalm/ ist es vmb einen
sterblichen menschen/der den thodt/vñ
desselbigen Memorial hindan setzet /
vnd wissend nicht wissen wil / das er
sterblich/vnd sein leben ein Ende habē
mus / Ach Gott wir lassen vns wol
düncken/das die obgemelten Kaiser vñ
König/gar grobe/vergessene/vnd vom
Teuffel bethörte menschen sind gewes
sen/welche irer vnsterblichkeit vergesse/
vnd hie fur vnd fur in irem stand/Ehre
pracht vnd macht zu bleiben vnd zubes
harren sich vermutter. Wie viel meinen
wir aber / das noch heut zu tage leute
sind / in hohen vnd nidrigen stenden /
welche ja so vergesslich/alle sterblichkeit
hindan setzen / vnd nicht eins an den
thodt gedencen / vnd ob sie alle tag
Adams memorial fur augen haben/vñ
sehen wie einer noch dem andern dohin
felt vnd stirbet/so bald Jung als Alt/
auch von der seiten / von irem tisch/

vnd aus irem bette/ire negste/ liebsten/
vnd bluts freunde absterben/gleichwol
vom Teuffel verblindet/mit sehenden
augen den thod nicht sehen/nicht sehen
wollen/nicht eins daran gedencfen das
heute oder Morgen die rheyne auch an
sie komme / vnd der thod sie auch zum
tantz füre/ O Jammer vnd Elend/wie
arme leute sind wir arme sterbliche
menschen / wie gar nichtig ist dieses
vnsere leben/wie sind wir so gar mitten
im thod/wie die kirch singet/wen wir
mitten im leben sind/in der besten blüe.

Ach Gott wie viel leute sind
auch jzunder mit vns/vnd vntter vns
Lebend/welche/ob sie des thodes inges
denck/ für dem zukunfftigen thod sich
herzlich fürchten vnd scheuen / wen es
in irer wilkür stunde / oder wunschen
giltte/die nicht Got seinen Himmel wol
ten lassen/ vnd allen Menschen zehen
Himmel für einen gönnen / wen sie nur
auff erden/in irem stande/in irem thun
vnd wesen/auch bey zimlichen glücke
vnd wolfart / möchten bleiben / Nie
mant bekent solches mit dem Munde/
aber im hertzen/ sind sie voller solcher
wunschung

wunschung vnd begirde.

Ach Gott lerne du vns / das wir sterben müssen / vnd vnser leben ein Ende neme müsse / Ach Gott las vns das end bedencken / das wir fürsichtiglich in deiner furcht vnd liebe wandelē / vnser hertzen von diesem zeitlichen / sterblichen leben / auff das Ewige zukünfftige / wenden vnd richten Amen.

Fur das ander / brauchet der Sathan / des thods stieffter vnd General Oberster / nicht geringer lieft vnd betrug / oft gemelten Adams Zettel / den Menschen der massen / aus den hertzen vnd augen zurucken / das sie in vergesssenheit vnd hindansetzung dieses zeitlichen thodes in sichern leben / vnd Gotlosen wandel / mit dem ewigen thodt / zum verdammis vnd ewigen sterben / werden vberfallen / vnd wie nu aber der Teuffel dem Ersten hauffen / den thodt gar aus den augen setzet / greiffet er den andern mit dieser geschwindigkeit vnd listigen betrug an / weil er sie zu entlicher vergesssenheit vnd hindansetzung des thods / nicht kan bringen / weil sie behalten des sterblichen menschen / thun
vnd

vnd wesen/gedechtnus/vnd wissen das
sie sterben müssen/ machet er ihn sol
che hertzen vnd gedancken/das sie den
wissentlichen Todt/gantz vnd gar in
verachtung setzen/ desselbigen furcht/
schrecken/vnd abschew/ se gering als
ein mahbletlein scherzen/ vnd ob auff
Erden nichts greulichers / der Natur
mehr zu wieder/nichts erschrecklicher
als der thodt/ kan der Satan / als ein
Tausent Kunstler/ solch furcht vnd
schrecken/der massen den menschen zu
rück setzen/das nicht eins dauon ge
dacht wirdt/ vnd die Leute/als von
im vorblindet vnd bethöret/dem vihe
gleich werden/wie der 32. Psalm sagt/
wie die vnvernünfftigen thire leben
vnd sterben/mit der wilden Gans in
das weite grüne felt fligen/ allein auff
dis zeitlich leben ihr thun vnd fürhas
ben setzen vnd wenden/seen/pflanzen/
barwen/essen/trincken/sind guthe ges
ellen/suchen allein das/dencken vnd
trachten allein nach dem/was zu dies
sem leben dienstlich/was zur lust/fray
den vnd aller glückseliger/ zeitlicher
wolfart förderlich/fragen weder nach
C Gott

Gott noch dem Teuffel/ achten weder
Himmels noch der Helle/am leben/vnd
wolleben ist in allein alles gelegen/sie
mögen nach diesem leben hinfaren/ wo
hin sie können/ in Himmel oder in die
helle/ es gilt in gleich/sie werden doch
gesellschaft gnugsā finden / wo sie auch
hinfahren/ vnd können vbel leiden/
wen man der Helle oder Himmels des
gedenckt/von einem andern leben ihn
viel prediget / vnd sprechen solchem als
len zu wider vnd zu trotz/ mit vollem
munde vnd hertzen/ wie vorzeiten die
Epicurischen sew/ Pereat qui craftina
curat, Ede bibe, lude, post mortem nulla
uoluptas, Vnd wie auch Paulus von
ihnen redet/vnd zu seinen zeiten/ dieser
Leute in grosser menge vnd anzahl/ in
seiner Kirchen auch gehabt hat/ Eda-
mus & bibamus, cras enim moriemur,
Es ist kein besser leben/ als ein gut les
ben/last vns essen/trincken/frölich vnd
guter ding sein / wer weis wie lang /
heut sind wir frisch/gesund/vnd leben/
morgen sterben wir/ last vns der welt
gebrauchen/ weil wir darinne sind/ Es
ist zeit genug zu trawren wen trawren
Kompt/

Kompt/ vnd der Todt vns vberraschet/
Qui mortem metuit, perdit idipsum
quod viuit, Man mus an Todt nicht
eher gedencen / er komme den selbst /
solche gedancen / thun nichts zum qua-
ten leben / sie machen nur schwer geblüt
vnd gemüt / Non est magnus, qui
magnum putat, quod homines moriun-
tur, & folia cadunt de arboribus, Es ist
heut nicht new / das das laub von den
beumen felt / es ist kein wunder das ein
Mensch stirbet / die todten mit den tod-
ten / die lebendigen mit den lebendigen /
lass sterben was nicht bleiben wil /
wer reiff ist der falle ab / an wen die
reihe kompt der fahr dahin / vnd fal
aus der zeche / last vns sorg von hertzen
schlagen / ein guter mut ist das beste le-
ben / kompt der Todt so kom er / wie
sind hie.

Dis seind wort vnd gedancen/
des andern hauffen / des grösten / bez-
sten / vnd meisten theil der Menschen /
vom Sathan erschrocklich vorblendet
vnd bethoret / mehr Vihisch als Men-
schlich / vnd ist hoch zubeclagen / das

C ij der

der schandt Teuffel/aus einer vornünftigen creatur vnnnd Herrlichen schönen vnd edlen geschöpffe Gottes/ein solche vnflchtige/vnuernünfftige/Epicurische sau kan machen. Noch jemmerlicher aber ist zu beklagen/das der Teuffel in diesen Ierwischen orden vnnnd profefion bringet/die besten vnd fürnemmbsten leute/welche auch für weltleut gerühmet vnd gelobet werden/vnd für andere den vorzug haben/wen man auch einen jungen auffwachsenden Menschen sihet/der sich dermassen in die welt anfehlet zuschicken/auff dieses leben/thun vnd wesen sich anfenglich begibt/sagt jederman/das ist ein feiner Knab/ein geschickter junger Mensch/do wird Ehr aus werden/der Mann wird sich wissen zu nehren/er wird einen guten hendler/vnd Kauffman geben/es wird ein guter Jurist vnd Hoffmann daraus werden.

Das möchten wir aber mehr beweisen als beklagen/das in diesen letzten zeiten/vnnnd vnter dem aller grösten schein vnd licht/des heyligen Euangelij/dies

liij/dieser Sauteuffel/am mechtigsten
regirt/ vnd sonderlich vnter denen leuz-
ten/welche den Namen haben/ vnnnd
haben wollen / das sie gute Christen/
vnd Euangelisch sein/ vnd vnter Türz-
cken/ Juden vnd Heiden/ nicht so Vis-
hisch/ frech vnd sicher weltleute/ wel-
che Gott vnd sein wort/den Himmel vnd
die Hell/todt vnd sterben/so gar in ver-
achtung setzen/ sind zufinden / als eben
vnter vns Luterischen/ vnd wir sind
auch in warheit/die jenigen/sonderlich
vnd fürnemlich/ von welchen der Herr
weissaget/Matthe: am 24. vnd Paus-
lus 2. Timot: 2. Es ist in nur vmb ses-
hen/pflanzen/bawē/kauffen vnd vork-
kauffen zuthun/ vmb wucher/ Geitz/
allerley partit vnd finanzerey. Wir
wollen sein Filij Dei/ Gottes Kinder /
vnnnd sindt klüger vnd vorstendiger
welckinder/ als in einer andern Natis-
on vnter der Sonnen zufinden. Es ist
kein Volck auff Erden/das mehr vnd
begiriger dencket/ trachtet/ tag vnd
nacht/nach zeitlicher wolffart/hoffart/
pracht vnd aller wollust dieses lebens/
als eben wir/welche im grēsten liecht

zum letztenmal/ Gottes wort/ das zu
künfftige Ewige leben/ wird angekün-
diget/ es ist kein Volck/ das weniger
sich bekümmert vmb Gottes huld/
gnad/ vnd hoffnung des zukünfftigen
lebens/ als eben wir lieben Deutschen/
die wir/ wie der H. Err von Caperna-
him saget/ bis in Himmel sindt erhob-
ben/ aber bis in die Helle wider werden
ernidriget werden/ wir sind albereit im
sincken vnd fallen/ vnd ist vns nu mehr
nicht zuhelffen noch zu rhaten/ hülf-
vnd rhat wird vns reichlich angebot-
ten/ aber wir wollen selber vns nicht
rhaten noch helffen lassen/ Vnd wen
gleich das jzt gepredigte wort vns
nicht würde angekündiget/ durch wel-
ches wir von diesem leben/ zu dem zu-
künfftigen geleitet vnd geführet/ geleh-
ret vnd vermanet werden/ so solt vns
doch von diesem jzt sewischen/ fres-
chen/ fleischlichen/ vnd welt leben/
etwas abwenden/ das wir wissen/hör-
rens teglich/ bekennen es auch selbs/
das hic nicht lang mehr wirdt zu leben
sein/ das die aller letzten zeitten fürs
handen/ der Jüngste tag für der thür/
vnd der

vnd der Herr albereit im anzug / bis
leben zu enden / Himmel vnd Erden /
vnd alles was auff Erden / mit Feuer
zuuerbrennen / vnd ein ander Ewiges
leben / entweder zur ewigen freud vnd
seligkeit / oder aber zum ewigen wein
nen / heulen / zeenklappen / vnd verdams
nis / anzufahen vnd auffzurichten.

Wolan / es gilt nicht mehr rat
then / helfen / vermanen / vnd warnen /
hin ist dahin / wege ist wege / das
licht hat vns geschienen / die Sonne
ist vns hell vnd klar auffgangen / vnd
nu in die 50. Jahr inn klarem schein
geben / Finsternis bedecket nun mehr
Deutschlandt / vnser vnglück / so wir
albereit für der thür / dieses vnd des zu
künstigen lebens / ist vns nu mehr ver
borgen / wir können nicht wieder zu
rück / man hat vns lang gnugsam zu
tanzen vnd zum Ewigen freuden
gepfiffen / pfeiffen zum weinen vnd
allem betrubnus gehet nu an / damit
mögen wir nun verlieb nemen / wir
habens nicht anders haben wollen.

C iij

Aber

Aber wie dem allen/ so ist es gleich
wol auch an dem/ das dennoch/ wie
arg/ verdämlich/ sicher vnd frech/ dies
se letzte welt ist/ noch ein klein Kirch-
lein vnd versamlung Gottes Kinder/
mitten vnter den grossen vorechtlichen
hauffen Gottes worts/ des zukunfftis-
gen ewigen lebens vnd seligkeit/ noch
fürhanden/ vnd sein wird vnd bleiben/
bis zu der letzten zukunfft des HERRN/
wie wir in vnserm glauben sagen vnd
bekennen/ das eine Christliche Kirche
sey/ noch etliche frome vnd ware Chris-
ten/ im wort zusammen versamlet/
welche der HERR in seiner zukunfft
mit freuden werde empfangen/ vnd
sagen/ wie im 23. Cap: Matth: wirt
gemeldet/ Gelobet sey der da kompt/
im namen des Herrn/ etc.

Vnd die werden es auch allein sein/
welche in diesen letzten vnd aller ges-
sehrlichsten zeiten/ ihr thun vnd wesen
werden in acht haben/ von dieser bösen
welt sich absondern/ in Gottes furcht
leben/ vnd das end ihres lebens bedene-
cken/ Gott vmb ein seliges stündlein
bitten

bitten werden/ vnd darauff ihr hertz
vnd gedanken richten/ das sie in dem
iz gepredigten wort/nicht wie der ans
der freche/ Gottlose hauffe / wie das
vnuornünfftige Viehe dahin sterben /
sondern mitten im todt vnd absterben/
in rechten gewissen/ vnd ungezweiffels
ten trost vnd hoffnung/ der ewigen
seeligkeit/ von hinnen abscheiden/ vnd
als vnfreundtlich vnd abscheulich der
todt sonsten an sich selbest ist/ ihnen
im gepredigten vnd geglaubten wort/
lieblich vnd angenehmen sein / vnd mit
dem alten Simeon hertzlich wünschen
vnd begeren werden zu sterben/ vnd
mit dem lieben Paulo Cupio dissolui/
wolten auffgelöset sein/Mori lucrum/
den Todt für ihren besten freund hal
ten/ für ihr gröstes glück vnd wolfart.

Mit solchen hertzen vnd augen aber
den Todt ansehen/ das wechset nicht
mit vns auff/ habens auch nicht aus
Mutterleib mit vns bracht / sondern
wir müssen es aus dem gepredigten
wort nemen/ in demselbigen klug/ vnd
weis werden/ vnser letztes endt zubeden
cken/vnd seeliglich zu sterben.

C v

Vnd

Vnd stehet nu solchs in dem /
das Gott / am oben gemelten 3. Cap:
des Ersten buchs Moses / Adam nicht
allein des Tods erinnert / vnd in sol-
chen schrecken vnd furcht in leß steckē /
sondern das fröliche Euangelium / wel-
ches noch auff den heutigen tag wird
geprediget / im erstlich vnd anfenglich
ankündiget / vnd spricht in seinem bey-
sein vnd anhören / zur / Schlangen / Ich
wil feintschafft setzen / zwischendir vnd
dem Weib / vnd zwischen deinē Samen
vnd ihrem Samen / der sol dir den kopff
zutreten. Welche wort / wiewol damals
noch etwas verdeckt vñ vertunckelt ge-
redt / von der wider erlösung / vnd errets-
tung / vom kopff / gewalt vnd Herr-
schafft des Sathans / dennoch Adam
vnd Eva / von der errettung in der ges-
mein gesagt / etlicher massen haben ver-
standen / vnd mit trost vnd freuden an-
genommen / als nemblich / vnd in dem
verstand / das sie im Todt vnd in der
Erden / nicht ewiglich vergenglich blei-
ben sollen / sondern durch den Todt
wider zum leben kommen / Vnd dar-
rumb auch Adam / mitten in seiner
höchs

höchsten trawrigkeit / vnd gleich als
mitten im Todt/wider mit erfrewetem
vnd tröstlichem hertzen seine liebe Eua
anredet/ vnd spricht / sie sol nun fort
an Eua heißen/ das ist ein Mutter
der lebendigen Menschen/ welche im
Samen des Weibs/new vnd wider
geboren/leben vnd Ewig leben sollen/
vnd die Mutter sol sie sein/welche nu
aller erst recht lebendige vnd Ewig le-
bende Kinder auff die Welt sol brins
gen. Vnd die liebe Eua/ aus der frö-
lichen Botschafft vnd ankündi-
gung Gottes/ von der zurtrettung
des kopffes der Schlangen/ vnd auch
von ihrem Man dis erinnert/sich auff
höchste wieder erfrewet/ alle furcht
vnd schröcken des Todes vom hertzen
schleget/ vnd spricht/ nach etlichen ta-
gen hernach/ als sie sich schwanger bes-
findet/ Possedi hominem Deum, Ach
mein lieber Adam/nu hats nicht not/
ich habe den Man empfangen/ Gott
vnd Mensch/ der vns nu aus aller not
bringē /vnd der schlangen den kopf sol
zu treten. Vnd das ist das Verbū vite,
Das wort des lebens/von dem der allein
das les

Das leben ist/vnd allein was gestorben/
lebendig macht/das wort gibt Adam/
vnd Eva liecht vnd leben/das sie mit
ten in dem finstern Todt/im selben Klau
ren liecht das leben sehen/vnnd sich
des zukünfftigen lebens trösten/vnd
darinne hertzlich in hoffnung sich er
frewen.

Vnd eben also fasset auch Moses
im oben angezognen Psalm/beides zus
sammen/redet nicht allein erschreck
lich/von aller Menschen sterblichen
thun vnd wesen/sondern sagt auch das
bey vnd hieneben/wo vnd wie mitten
im todt/hülff vnnd rhat des lebens/
zusuchen vnd zufinden/vnd spricht:

Herr lehre vns bedencken das
wir sterben müssen/auff das wir klug
werden.

Herr kere dich wider zu vns/vnd
sey deinen knechten gnedig.

Fülle vns früe mit deiner gnade/so
wollen wir rühmen vnd frölich sein/
vnser lebenslang.

Erfreue vns nu wider/zeige dei
nen knechten dein Werck/vnd deine
Ehre ihren Kindern/vnd der **HERR**
vnser

vnser Gott/ sei vns freuntlich/ vnd
fordere das werck vnser hende bei vns/
ja das werck vnser hende wol er for-
dern.

Was aber nu diese klugheit sey/
klug zu sein vnd zu wandeln/ wie sich
der **HERR** wider zu ihnen sol keren/ das
sie sich rühmen vnd frölich sein/ wie
er sie mitten in aller trawrigkeit sol er-
frewen/ mitten im todt lebendig ma-
chen / sein Werck vnd Ehre im er-
zeigen/ das hat Moses dazumahl/ mit
Adam aus den Worten des Herren ge-
nommen vnd verstanden / von des
Weibes Samen/ darauff ist aller trost
vnd hoffnung der Israheliter vnd
Moses volck gestanden / das Werck
haben sie hertzlich begert zu fordern/
von Gott dem Herrn/ das derselbige
Same des Weibes erscheine vnd of-
fenbar werde/ vnd der Schlangen den
kopff zutretten/ wie den der **HERR**
Christus auch solchs bezeuget/ das all
hoffnung vnd trost der lieben Alten/
darauff allein gestanden/ da er sprichet
Matthe: am 13. Cap. Seelig sind ewe
re augen/ das sie sehen/ vnd ewe ohren
das

Das sie hörē/warlich ich sage euch/viel
Propheten vnd Gerechten haben bes
gert zu sehen/das jr sehet/vnd habens
nicht gesehen/vnd zu hören das ihr hö
ret/vnd habens nicht gehört. Wie er
den auch also redet von Abraham/
Joan: am 8. Cap: Das er hertzlich vers
langen gehabt/seinen tag zu sehen/hab
in auch gesehen/vnd sich gefrewet/ etc.

Was aber solch sehen vnd hören sey
vnd warinne sich Abraham habe ges
frewet/das erkleret er im selbigen Cas
pitel mit diesen Worten/vnd spricht/
warlich warlich sage ich euch/so ies
mant mein wort wird halten/der wirt
den Todt nicht sehen ewiglich/vnd
am 6. Capitel gibt er soches mit meh
ren Worten/vnd spricht:warlich war
lich ich sage euch/wer an mich gleubt/
der hat das ewige leben: Ich bin das
Brot des Lebens/ Ich bin das Brot
das vom Himmel kommen ist/ auff
das wer dauon isset/ nicht sterbe/ Ich
bin das lebendige Brot vom Himmel
kommen/wer von diesem Brot essen
wird/der wird leben in ewigkeit/war
lich warlich sage ich euch/werdet ihr
nicht essen das fleisch des Menschen

Sons/ vnd trincken sein blut/ so habt jr
kein leben in euch/ wer mein fleisch isset
vñ trincket mein blut/ der hat das ewig-
ge leben/ vnd ich werde ihn am Jüng-
sten tage aufferwecken.

Vnd am 11. Cap: sagt er/ ich bin die auf-
ferstehung vnd das leben/ wer an mich
glaubt/ der wirt leben/ ob er gleich stürz-
be/ vñ wer da lebt vnd glaubt an mich/
der wirdt nimmermehr sterben. Mit
diesen vnd gleichen Worten erkläret der
Herr Christus/ der Same des Weibs/
die wort oben gemeldet des Ersten
Euangelij/ vñ frölicher ankündigung/
der guten botschaft/ so Adā vnd Eua/
nach dem sentenz des todts/ von Gott
empfangen/ was der same des Weibs
thun vñ aufrichten werde/ wen er wird
kommen vnd offenbar werden/ wes sich
Adam mit allen seinen nachkömmling/
werde haben zu freuen vnd zu trösten/
als nemlich/ das sie durch ihn/ in ittē in
tod/ wider zum leben kommen/ vnd ein es-
wiges leben/ nimmer auffhörent erlangen
werden/ das alles in den oben angezoge-
nen Worten des Herrn Christi/ vmb's le-
ben zu tun/ wie die leute durch ihn wider
aus dem tod zum leben kommen sollen/

Wie den also vom Herrn Christo auch redet S. Paulus zum Hebre: an 2. Cap. da er sagt/ Nach dem nu die Kinder fleisch vnd blut haben/ ist es gleicher mas theilhaftig worden/ auff das er durch den todt die macht neme/ dem/ der des todes gewalt hatte/ das ist dem Teuffel/ vnd erlösete die/ so durch furcht des Todes/ im gantzen leben knechte sein musten/ etc.

Wie vnd auff wasserleyweis/ mittel vnd wege/ der Herr Christus den Todt überwunden/ wegk genommen/ vnd das leben wieder herfür bracht habe/ vnd durch den glauben an im/ alle Kinder des tods/ Kinder des lebens werden/ in im allein das leben haben/ vnd den Todt nimmermehr sehen solten/ das wird/ Gottlob/ nu zu vnsern zeiten/ reichlich allenthalben gelehret/ geprediget/ gesungen/ geschrieben/ vnd gemalt/ in diesem hellen klaren schein vnd liecht/ als sieder der Apostel zeit/ nicht bey einem Volck ist geschehen/ wie wir den vns dieses liches auch rühmen/ vnd Gott hoch dafür haben zu dancken.

Aber

Aber in summa / mit wenig worts
ten / auff dismal dauon zu reden / ist es
allein in dem fall / vmb den Herrn Chri
stum zu thun / in jm allein das leben zu
suchen / der auch allein der Herr vnd
Fürst ist des lebens / welcher allein alle
todten lebendig macht / vnd machen
kan / vnd ist ausserhalb jm / nichts dem
Finsternis vnd schatten des Todts / ja
auch alles todte / ausserhalb jm was
gleich lebet / wie denn er selber saget /
Ego sum uita, Ich bin das leben / vnd
auch Paulus solchs von dem Herrn bes
zeuget / do er sagt / 1. Corin: 1. Christus
ist vns gemacht von Gott / zur weiss
heit / vnd zur Gerechtigkeit vnd zur
Heiligung / vnd zur erlösung.

Vnd zum Coloss: am 2. cap. Das
auch die weisheit vnd erkenntnis / wie
aus dem Todt zum leben zu kommen /
auch in jm verborgen / von ihm allein
mus herkommen / vnd in ihm allein zu
suchen vnd zu finden / do er spricht: In
Herrn Christo liegen verborgen / alle
scherze der weisheit / vnd der erkenntnis.

Das heist nu / wie der psalm sagt /
preciosa mors sanctorum in conspectu
D Domini,

Domini, Das der Todt nicht mehr
scheuzlich vnnnd grewlich anzusehen/
nicht mehr erschrecklich vnd zu wider/
denen so für Gottes Angesicht / in sei-
nem waren erkentnis / vnnnd in solcher
Göttlicher Himlischer weisheit im
H. Herrn Christo offenbaret / leben vnd
sterben / denn das heist Mors preciosa
in conspectu Domini, Wenn der liebe
alte Simeon / in Gottes angesicht also
stirbet / Gottes angesicht den Heiland
Gottes / den Herrn Christum in seinem
Hertzen / Henden / vnnnd Arm hat / In
Christo / Gott den Vater sihet vnd er-
kennet. Wie Gott in seinem Son / nu
ein Gnadenreich angerichtet / in Chris-
to alles zu gnaden annimmet / Sünde
vergibet / gerecht vnd selig macht / mit
zerstörung vnd auffhebung des Reichs
des Teuffels / vnd des todtes.

In dieser himlischer weisheit vnnnd
erkentnis / im H. Herrn Christo verbor-
gen / vnd in anschawung des lieblichen
angesichtes Gottes / in seinem lieben
Son / hebet Paulus an sich hertzlich zu
sehnen vnnnd zuuerlangen / nach einem
seligen stündlein zu sterben / wündschet
vnd

vnd Begetet von hertzen / bey Christo
zu sein / welches er albereit ist / Tod vñ le
bendig / wie er dan selbst sagt / wir leben
oder sterben / so sind wir des Herrn / dem
Herrn lebē wir / dē Herrn sterbē wir etc.

Als dan kan ein Christ in diesem
erkentnis / nicht allein des Todts / wie
er sterblich / vnd sterben mus / sondern
auch in dem Memorare vnd gedencf
Zettel / das Christus im todt sein leben
sey / der in vom todt / durch seinen todt /
zum leben errettet vnd erlöset / mit frö
lichem vnd frewdigem hertzen sagen /
mit dem lieben Paulo / Christus ist
mein leben / vnd sterben ist mein gewin.

Dargegen aber wo das Memorare /
vnd gedencf Zettel des Todes / allein
ist vnd bleibet / aufferhalb dieser er
kentnis / vnd Himlischer weisheit / im
Herrn Christo / wie in jm / mitten im
todt / leben ist / vnd das leben anfahet /
do ist vnd bleibet der Todt / Mors om
nium terribilium terribilissimum , Das
aller greulichst vñ erschrecklichst ding /
vnter allen dingen / die dem Menschen
mögen erschrecklich fürfallen / vnd
möchte jm einer wünschen / das im nunt
D 2 mer mehr

mer mehr kein gedancken des Todes
einfiel/oder das einer vnuersehens vnd
plözlich / außserhalb vorgehendent
schrecken vnd furcht des Todes/ möch-
te sterben / vnnnd den Todt nicht lang
dürffte für Augen sehen vnnnd wissen/
wie man denn saget / Mors est in cogi-
tatione / Das die vorgehenden gedant-
cken / vnnnd furcht des Todes / erger/
schmerzlicher / vnd erschrecklicher sein/
als der Todt an im selbst.

Vnd darumb auch der grosse Röm-
mische Keiser Julius Caesar (von
welchem anfenglich alle Imperatores,
Caesares/oder Keiser werden genennet)
do er würde gefraget / welcher Todt am
besten / vnnnd am meisten were zu wün-
schen / antwort er vnnnd sagt / Inopinata/
ein vnuersehender Todt / wie denn
im auch ein solcher vnuersehender vnd
schneller Todt / widerfahren / do er im
Rath zu Rom / vberfallen vnd erschla-
gen wurde.

Wo nu aber die vorgedancken des
Todes / einem für die Augen kommen/
vnd außserhalb Gottes erkentnis / vnd
des Fürsten des lebens / des todts vber-
winders/

winders vnd obfigers / vnd mit zu plas-
tzen/die gedancken/für schmachte/ vnd
furcht des ewigen todtes / do heist es/
Mors peccatorum pessima, O todt
todt/wie sawer/bitter/ vnd erschreck-
lich bistu / O wehe vnd vber wehe / wo
nu aus oder ein/ nu sol ich sterben / wo
nu hin/wie wird nu mein geward wera-
den/Wie denn solcher leute todt vnd
absterben / also erschrecklich beschrei-
bet/vnd den rohen / sichern / Weltkins-
dern/verechtern Mosis/der Prophetē/
vnd schos Abrahæ/fürmalet vnd also
erschrecklich für die Augen stellet / der
Herr Christus Lucae am 16. Cap: in
dem Reichen Mann/vnd von Cain an-
fenglich / in anderen vielen erschreckli-
chen Exempeln vnd Historien in der
Schrift/ desgleichen vermeldet wird.

Das sey nu gesagt / von dem ersten
verstand des memorare nouissima / des
Memorials vnd gedencf Zettels / des
zeitlichen todes vnd absterbens / im
Herrn Christo zu fried vnd frewd im le-
ben vñ sterbē/ od aber aufferhalb seiner/
zū vnfried traurigkeit/hie anfenglich vñ
dort ewiglich: Wollen nu zū andern ver-
stand greiffen.

D 3

Was

Was nu ferner Nouissima heissen/
die letzten ding / so zubedencken / das
meldet der H^{er} Christus Luc: am 21.
vnd Matthei am 24. cap: In seiner
Prophecey vnd weissagung von denen
dingen/so sich kurz fur dem Jüngsten
tage/vnd folgendts an dem selbigen tag
ge werden zutragen. Als nemlich / das
schnel vnd plözlich/ wenn die leute an
aller sichersten/vnd mit sauffen/fressen/
vnd sorgfeltigkeit der Narung / mit ses
hen/pflanzen/bawen/keuffen vnd ver
keuffen beladen / oben am Himmel sich
alles ganz erschrecklich werde stellen
vnd geberden / die Sonn vnd der Mond
iren schein werden verlieren/ die Stern
vom Himmel fallen / die krefft der H^{im}
mel sich bewegen/vnd wie Petrus sagt/
Die Element für hize zur schmelzen/
vnd die Erde vnd die werck die drinnen
sind verbrennen werden / vnd als
denn den leuten wird hertzlich angst
vnd bang werden/ vnd verschmachten
werden / aus furcht vnd warten der
grausamen erschrecklichen dinge / so
vber die ganze Erden kommen werden.
Vnd endlich nach solchem allem / wer
den ses

den sehen komet des Menschen Son/
mit grosser krafft vnd herrligkeit den
Gottlosen zu grossen hertzlichen schrea-
cken / zittern / vnd sagen / das sie auch
werden wünschen vnd sagen / das alle
Hügel vnd Berge auff sie fallen / sie bez-
decken / das sie für dem Son des mens-
schen nicht zum Gericht / vnd ewigen
verdammnis gefüret / vnd dargestellet
werden.

Wie denn auch der Prophet Sopho-
nias von diesem tag / mit erschreckliche
worten redet am 1. cap: vnd spricht:
Dieser tag ist ein tag des grimmes / ein
tag der trübsal vnd angst / ein tag des
wetters vnd vngestüms / ein tag der
Sinsternis vnd tuncfels / ein tag der
Wolcken vnd Nebels / ein tag der Po-
saunen vnd Trommeten.

Vnd des wegen auch der heilig Apo-
stel Paulus / vns dieser letzten hendel er-
innert / darauff acht zugeben / vnd stets
derselbigē sich zu erinnern / do er spricht
zum Römern am 14. cap. Wir werden
alle für dem Richterstuel Christi darges-
stellet werden / vnd 2. Cor: 5. Wir müß-
sen alle offenbar werden für dem Richt-

stuel Christi / auff das ein jglicher emp-
pfahē nach dem er gehandelt hat / bey
leibes leben / es sey gut oder böß.

Tu ist es aber (wie oben im ersten
verstand gemeldet) hie auch nicht gnug
vnd damit ausgericht / das solche letzte
vnd zukünfftige erschreckliche ding mit
furcht vnd schrecken bedacht werden /
sondern es mus hie auch heissen / memo-
rare nouissima / das man daneben auch
bedencke vñ betrachte / wie izunder im
gepredigten wort in der zeit d̄ gnaden /
vnd am tag des heils / man sich zu sol-
chem tag fertig vñnd bereit mache /
wer von Gott dazu begnadet / vnd als
lem dem / was so erschrecklich zukünfft-
ig ist / möge entfliehen / vñnd wenn der
gröste / beste / vñnd meiste hauff der
Menschen / wird in den aller grösten /
herzlichsten engsten stehen / weinen vnd
heulen / das als dan erliche im waren
Gottes / vnd des Herrn Christi erkent-
nis entschlaffen / oder auch noch beym
leben sind / mit frölichem hertzen / vñnd
mit auffgerichtem heupte gen Himmel
sehen / auff ire erlösung wartend / sine
gen



gen vnd sagen werden / Hosanna / Hosanna / Gelobet sey der da kömpt im Namen des Herrn / vnd auch folgents außershalb aller furcht vnd schrecken stehen für des menschen Son / vnd des ewig frölichen eingangs der ewigen herrlichkeit gewarten werden.

Wie man sich aber nu in diese letzte zukünfftige dinge solle schicken / auff dz / was anderen leutē hertzlich erschrecklich / den frommen vnd Gottes kindern frewdig vnd hertzlich frölich sey / was andern zum ewigen Zorn / Todt / vnd verdammis wird gereichen / ihnen zur ewigen freude vnd seeligkeit komme / das lehret der Herr Christus des Menschen Son / der als dan kommen wird zum Gericht / vnd spricht.

Erstlich / Cauete uobis à crapula & ebrietate, Das sich die seinen ja wol sollen hütten vnd fürsehen / das sie mit dem grossen verdampften hauffen / der in den letzten tagen mit sauffen / fressen / sorgfeltigkeit der Narung / mit sehen / pflanzen / bauen / keuffen vnd verkeuffen / sich wird beladen / nicht in gleicher sicherheit vnd sündlichem Leben /

D 5

mit

mit seinem Tage werde vberfallen.

Zum andern/ Vigilate omni tempore deprecantes, Das sie mit stetem wachen vnd vnauffhörlichem Gebet/ auff seine zukunfft sollen warten / wie er denn inen solch wachen vnd beten sein anzeiget/ mit etlichen Gleichnissen im 24. vnd 25. Cap: Matth: Von dem Hausuater der zur nechtlicher zeit des Diebs war nimmet / vnd sein Haus bewaret: Von dem Knechte/ welchen der Hausuater vber sein ganzes Hausgesinde gesetzt / von den zehen Jungfrauen/ von den Knechten / welche jr Herr vber seine Güter setzet / dieselbigen in vntergiebet / auff den Wucher auszuthun.

Aber zu erklerung vnd weitlenfftiger deutung dieser Gleichnis / wollen wir izunder vns nicht zeit vnd raum nemen/befehlen frommen Christen dieselbigen in jr eigen nachdencken vnd betrachtung.

Aber kurtz vnd in der summa/izunder von diesen hendeln zu reden / ist das meiste vnd fürnehmste an dem allein gelegen / das wir in dem jzt gepredigten
wort

wort vnd Euangelio / in dem jzt schei-
nenden Liecht vnd zeit der gnaden zu
diesem erkentnis vnd weisheit komen /
im Herrn Christo / wie wir der Sünden
loß vnd gefreiet / wie wir bey Gott ges-
recht / from / vnd seelig gemacht wer-
den / durch den Glauben an seinen Son /
im verdienst seines leidens / sterbens /
vnd frölicher Aufferstehung / vnd in
solcher gewisser versicherung / der ewi-
gen seeligkeit befreuung des Tods / vnd
ewigen verdammis / im Herrn Christo
frölich leben vnd sterben / vnd warten
mit freudigen hertzen / auff die erschei-
nung des grossē Gottes / auff die ewige
freudige einnehmung vñ besitzung der
ewigen herrlichkeit / vnd an vns eben
das geschehe vnd sich zu trage / wie es
mit den Israelitern in Aegypto ergan-
gen / ober welchen Gottes grosser Zorn
für ober gieng in der nacht / da in allen
Aegyptischen anderen Heusern / die er-
sten geburt von Vihe vnd Menschen
würden erwürget / deswegen / das der
Israeliter Heuser Thür vnd Pfosten /
mit dem Blut des Lembleins waren
besprenget / vnd Gott das Blut sahe /
vnd

vnd mit seinem grim̄ vnd zorn fur vber
ginge. Das wir auch also / wenn heute
oder morgen / der tag des Zorns wird
kommen / mit dem Blut des rechten
vnd waren Lembleins besprenget / von
Gottes grossen vnd erschrecklichen
zorn / in welchem er zum ewigen Todt
wird würgen vnd tödten / gefreiet / zum
gelobten Land / vnd zum ewigen leben
erhalten vnd eingefüret werden / wie
denn auch in der Offenbarung Johans
nis am 7. Cap: wird solchs bezeiget vnd
angezeiget / als nemlich / das diese bey
Gott sein / für Gottes Thron stehen /
vnd Gott tag vnd nacht dienen wer
den / welche jr Kleider im blut des Lem
leins haben gewaschen / denn dis Blut
allein / sagt Joannes in seiner Epistel /
vnd sonst keines / das Blut des Sons
Gottes / reiniget vns von allen vnsern
Sünden. Mit diesem Blut besprenget /
werden alle Gottes Kinder / als die ges
heiligten vnd gebenedeiten am Jünge
sten Gericht / dem Sententz vnd vr
theil / mit frölichem hertzen anhören /
Kompt her ihr gesegneten meines Vaa
ters / vnd besitzet das Reich / das euch
von

von der Welt anfang ist bereitet.

Dargegen aber / wie der erste leiblich
ther vnnnd zeitlicher Todt / vnter allen
erschrecklichen dingen / am aller schreck
lichsten den Menschen für kömpt / wie
oben gemeldet / also wird dieser ander
vnd ewiger Todt / für dem Richtstuel
des Herrn Christi / tausent / vnnnd vber
tausent mal / schrecklicher sein / vnnnd so
schrecklich / das dauon izunder mit
menschlicher Zungen nicht kan geredt
werden.

Dis sey kürzlich gesagt von dem an
dern verstand / wollen nun den dritten
auch für vns nemen / vñ ferner fromen
Christen / in diesen letzten / vnd aller ges
fahrlichsten zeiten anzeigen / was die
Nouissima sind / die letzten dinge / dar
auff jr hertz vnd gedancken sol gerichtet
sein / sicherheit / vnd izt fürfallend frech
vnd rohes leben zu meiden.

Vnd ist nu deswegen nicht on vrs
sach vnd vergebens / das der Herr Chris
tus seine zukunfft zum Gericht am
Züngsten tag / so mit viel worten vnd
allen vmbstenden beschreibet / vnd ons
zweiffel darumb geschehen / vnnnd dem
Herrn

Herrn zu thun gewesen / Das er den sei-
nen ja solche letzte zukünfftige dinge
fleissig zu bewegen vnd zu bedencken
hat wollen einbilden / damit sie sich in
diesem leben / recht in die sache schicken /
vnd darnachdencken vnd trachten /
wie / vnd auff wasserley wege vnd mit
tel / alles des / was zur ewigen Frewd ge-
hörig / mögen theilhaftig werden / vnd
entfliehen allen dem / was sich zur ewi-
gen trawrigkeit als denn wird zutras-
gen / das dis sein vornemen vnd meis-
nung sey / ist aus dem kund vnd offens-
bar / das er Luc: am 21. seine ganze rea-
de vnd Sermon / von denen dingen / so
sich am Jüngsten tage werden zutras-
gen / endet vnd schließt mit diesen worts-
ten: So seid nu wacker alle zeit / vnd
betet / das ihr würdig werden möget / zu
entfliehen diesem allem / das geschehen
sol / vnd zu stehen für des Menschen
Son / etc.

Das ist der ganze handel / das wil
vns der Herr zugemüte führen / das wir
an solche Nouissima letzte ding sollen
gedencken / vnd vns also verhalten /
ein mal / das wir alles vnglück vnd bes-
trübnus /

trübnuß / so sich am selbigen tage wird
begeben / mögen entfliehen / fürs ander /
das wir freudig / frölich / vnd mit auff
gerichtem Haupt stehen vnd bestehen
können / für seinem Angesicht / etc.

Demnach / so ist nu das letzte No-
uissima oder dinge / welches vnter an-
dern der H^{er} Christus vns wol wil
einbilden / vleissig zu bedencken / da er
spricht / was er für wort werde ge-
brauchen / wenn er den Sententz vnd
vrtheil wird fellen / vnd gehen lassen /
als nemlich / wie er sage / da wird dann
der König sagen zu denen zu seiner rech-
ten / Kompt her etc. denn wird er auch
sagen zu denen zur Lincken / Gehet hin
von mir jr verfluchten / Vmb diese eini-
ge zwey wörtlein / wird es zuthun sein /
welche endlich vnd letztlich vnuermeid-
lich / entweder zur ewigen freud / oder
aber zur ewigen betrübnuß / in aller
Menschen Ohren werden erschallen /
Ite, Venite, Kompt her / Gehet hin.

Diese zwey wörtlein / sage der alte
Lehrer Hieronymus / habe er ihm also
eingebildet / das wo er gehe oder stehe /
esse oder trincke / schlaff oder wache / im
immer

immer düncke/wie er sie in seinen ohren
höre klingen vnd schallen/ wolt Gott/
das alle fromme Christen dergleichen
theten / so würde viel böses nach blei-
ben/ vnd fleischlich sicherheit leicht-
licher vermittelt werden / wie denn
vnsrer Spruch also lautet / so wir für
vns igunder haben / Memorare nouis-
sima & in æternum non peccabis, Bes-
dencke das end/ so wirstu nimmermehr
böses thun.

Man sagt / das die Vbeltheter / so
fürs Gericht gestellet werden / sich be-
trübter vnd schmerzlicher befinden/
wenn der Richter den Stab bricht/
vnd sie zum Todt verurtheilet / als
für dem peinlichen Todt selber. Aber
was sich für einem Menschen / vnd
menschlichen Gericht zutreget / ist gar
nicht zuuergleichen / mit dem / was sich
für Gottes Gericht / vnd wenn Gots-
tes Son selber das Vrtheil wird spre-
chen / als dann wird begeben vnd zu-
tragen / darumb erinnert vns auch der
Herr / wie oben gemeldet / solches Ges-
richts des vrtheils / vnd sonderlich der
ausdrücklichen wort / Ite / Venite,
Kompt

Kompt her / gehet hin / das wir für der
zeit daran sollen gedencen / vnd solche
letzte zukünfftige dinge betrachten.

Aber wie wir in den vorgehenden
beyden verstand haben gemeldet / ist es
hie in diesem dritten auch nicht gnuga
sam / diese beide wörtlein zu bedencen /
furcht vnd schrecken daraus fassen /
sondern es mus das ander vnd das
fürnemest auch darzu kommen / als
nemlich / wie im in diesem lebē zuthun /
das wir vns in gewisser hoffnung / des
im leben vnd sterben können trösten /
das wir gewis vnd vbergewis das ei
ne wörtlein / werden mit freudigem
hertzen anhören / am tag des Gerichts /
Venite, Kompt her / vnd das ander er
schreckliche lte, Gehet hin / als dan in
vnsrer Ohren nicht kommen sol / das
wir nicht in zweiffel / in schrecken / vnd
furcht leben vnd sterben / sondern mit
freudigem hertzen vns sehnen vnd ver
langen haben / nach demselbigen tage
des Herrn / vnd beten in Vater vnser /
Zu Kom dein Reich / vnd warten / wie
Paulus zu Tito sagt am 2. Cap : auff
die selige hoffnung vnd erscheinung
K der

der herrlichkeit des grossen Gottes/ vnd
vnsers Heilands Ihesu Christi/ der sich
selbst für vns gegeben hat/ auff das er
vns erlösete von aller unreinigkeit/ vnd
reiniget im selbst ein Volck zum eigens
thumb / etc. Wie wir aber vns dieser
sachen sollen vnd können gewis ma
chen/ vnd in ungezweifelter hoffnung
jzunder leben / vnd der mal eins darin
ne sterben wollen/ das wir gewis vnd
obergewis/ mit freudigen hertzen / diß
fröliche vnd oberfröliche Venite, wer
den in der Auferstehung der Todten/
zu der rechten des H^{er}rn Christi ste
hend anhören/ das wird durchs ganze
Jar jzunder/ Gott lob/ in der Kirchen
gehandelt/ so oft der Artikel von der
Rechtfertigung/ wird gelehret vnd ges
prediget. Aber jzunder etwas / vnd
mit wenig Worten dauon zu reden / so
stehet dieser handel in dem / das wir
diesem König/ welcher als dann der zu
künfftige Richter sein wird/ jzunder in
der ersten zukunfft ins fleisch annemen/
an in glauben/ sein Wort halten / in sei
nem jzt gepredigten wort/ unsere Sün
de erkennen/ vñ mit trawendem hertzen/
von

von tag zu tag / vergebung aller vnser
Sünde bey jm suchen / vns in seinem
Blut lassen waschen vnd reinigen / vnd
von der Tauff an / im wort der versös-
nung / bleiben vnd beharren / vnd in
stetem Büßen vñ Beichten / im Leicht-
stuel vnd Sacrament des Altars / ver-
gebung aller vnser missethat / hertzlich
begeern vnd entpfahen. Denn jtz-
under in dieser seiner ersten zukunfft / ist
er darumb kommen / vnd von seinem
Vater gesandt / nicht das er sol verdam-
men / richten vnd verurtheilen / sondern
from / gerecht / vnd selig machen / wie er
denn solchs von sich selbst bezeitet /
Joan: am 10. Cap: da er spricht: Ich
bin kommen / das sie das leben vnd vol-
le genüge haben sollen / darumb er auch
jzunder mit lauter ruffender Stimme /
heist zu jm kommen / alles was beladen /
mühselig / Gottes zorn / schrecken / vnd
furcht des Todes vnd ewige verdam-
nis fület / mit gewisser vertroöstung vnd
rechten rath / jederman zu helffen / vnd
niemand ungeholffen von sich zu las-
sen. Was er jzunder aber / in seinen gna-
den schos fasset vnd nimet / das wil er
in ewig

in ewigkeit darinne behalten / alle sün-
de in die tieffe des Meers werffen / vnd
nimmer mehr gedencken / wie dan Za-
charias also von ihm hat geweissaget /
das er in seiner ersten zukunfft kommen
sol / sanfftmutig als ein gnaden König /
der seine herrschafft auff den schultern
trage / wie Esaias von ihm Prophecey-
et / mit Gnaden vnd Barmhertzigkeit
regiere / nicht richte vnd verdamme /
sondern voller gnade / reiche vnd vns
auffhörliche gnade mittheile / allen so
zu ihm izunder kommen / gnad vnd ver-
gebung der Sünden bey im suchen / wie
er denn solchs von ihm selber bezeuget
mit schönen Worten / Ioan: am 6. Cap.
vnd spricht / Ich bin das Brot des les-
bens / wer zu mir kompt / den wird nicht
hungern / vnd wer an mich gleubet / den
wird nimmermehr dürsten / Alles was
mir mein Vater gibet / das kompt zu
mir / vnd wer zu mir kompt / den wer-
de ich nicht hinaus stossen / das ist der
wille des / der mich gesandt hat / das
wer den Son sihet / vnd gleubet an in /
habe das ewige leben / vnd ich werde
ihn aufferwecken am Jüngsten tage.
Warlich

Warlich warlich/ich sage euch/ wer an
mich gleubet/ der hat das ewige leben/
Ich bin das lebendige Brot/ vom His
mel komen / wer von diesem Brot essen
wird/der wird leben in ewigkeit / Wer
mein Fleisch isset / vnnnd trincket mein
Blut/der hat das ewige leben/ etc.

Wer nu deswegen izunder diesen
Gnadenkönig/vnd seinem gnadenreich
wird durch den Glauben eingeleibet/
vnd in diesem lebē von jm macht vñ ges
walt empfenget / Gottes Kinder zu
werden / in solcher Kindschafft lebet vñ
stirbet/in solcher macht vnnnd gewalt/
mit stetem büßenden vnnnd reuohendem
herzen/gnad vnnnd vergebung aller seis
ner Sünde/von einem tag zum andern/
vnd einen tag sieben mal / ja sieben mal
siebenzig mal entpfehet/ sich in solcher
obergebener macht vnnnd gewalt / im
mer lest krönen/mit gnaden vnd Barm
herzigkeit/der ist der sachen gewis vnd
obergewis / vnnnd hat sich der frölichen
anhörung dieses wörtleins Venite zu
erösten/im leben vnd sterben/ denn das
sind Gottes heiligen / Gottes Kinder/
vnd die gesegneten Gottes / wie sie der

Herr also nennen vnd zu sich ruffen
wird / am tag des Gerichts / welche jtz
under leben vnd sterben / wie der 33.
Psalm saget / in stetter vergebung der
Sünden / sein vnd bleiben / in Ecclesia
sancta, communione sanctorum, vnd re-
missione peccatorum, im wort vnd
Sacramenten geheyliget / vnd mit
allen Gottes Kindern / aller güter Chri-
sti theilhaftig werden / vnd tegliche
vergebung ihrer Sünden entpfangen /
Diese sind nu aller furcht frey / vnd kön-
nen von hertzen beten / vnd wünschen
die zukunfft Christi zum Gericht / vnd
für im mit auffgerichtetem Haupt zu ste-
hen / vnd warten auff das vrtheil des
Gerichts / etc.

Dargegen aber / was für hertzeleid
vnd schrecken / plözlich wird diese vber-
fallen / welche jzunder so gar frech vnd
sicher leben / weder an Todt noch leben /
an Himmel oder Hell / an Gott oder
den Teuffel gedencen / sondern allein
dahin gehen vnd wandelen / im lust des
Fleisch / lust der Augen / vnd hoffart des
lebens / vnd ob jnen gleich eine furcht
der zukünfftige dinge einfellet / als bald
wider

wider aus dem hertzen vnd sinne schla-
gen / vnd sagen / wie die Diebe vnd
Strassenreuber / eine gute Malzeit sey
Zenkens werd / eine gute beute auff
der Strassen / sey mit Khadbrechen zu
bezalen / Ob sie in Himmel oder in die
Helle kommen / ob sie werden am tag
des Gerichts hören / Venite oder Ite,
Kompt her / oder gehet hin / das gelte in
gleich / sie kommen hin wo sie wollen /
werden sie geselschafft gnugsam finden /
in der Helle ja so viel / vnd noch wol
mehr / als im Himmel. Die Helle sey
auch ja so heiß nicht / als sie die Pfaffen
machen. *Pereat qui craftina curat*, es
möge kommen der mal eins / was nicht
kan aussen bleiben / so lang wollen wir
nicht zu rück dencken / sondern gute Ges
ellen sein / vnd in des mit wollust
vnd freuden gebrauchen / was vns
jzunder widerfaren kan / etc. Wie sich
aber der mal eins / solche gedanken /
hertz vnd wort werden endern / vnd sol
cher frecher sinn vnd muth / inen wer
de gebrochen werden / das lest sich jzun
der in diesen Gesellen / gnugsam sehen
vnd erfahren / wenn sie Meister Hans

am Stricke hat / für Gericht füret / ans
Klaget / vñnd das vrtheil begeret vber sie
gesprochen zu werden / wie sie entblas
sen / wie inen aller muth vñnd frechheit /
ja auch das Hertz in die Hosen falle / mit
waser furcht / Kleinmütigkeit / schrecken
vñnd Hertzleid / sie werden vberfallen /
wie inen das Hertz im Leib zur bricht /
wenn der Richter den Stab bricht / vñ
saget / füre sie hin / vñnd thue ihnen ihr
recht / gib inen was sie verdienet haben.
Aber solch schrecken vñnd furcht / ist als
les Kinderspiel / gegen dem zukünfftig
gen schrecken / so sich für dem Richts
stuel vñnd aussagung des Sententz vñnd
Vrtheils / wird zutragen. Denn so viel
der Richter an demselbigen tage vber
trifft / als Gott vñnd Gottes Son selb
ber / den Richter der zeitlichen straff / als
einen Menschen / so viel wird auch die
furcht / trübnus / vñnd hertzleid / vber
trefflicher sein / Vñ wie zeitliche straff /
kaum ein viertel stund werend / gar nit
zuuergleichen / mit diesem erschreckli
chen Sententz vñnd Vrtheil / zur ewigen
straff / pein / vñnd marter / also wird auch
als der schrecklicher fürfallen / in den
Ohren

Ohren der verdampften / diß wörtlein
Ite, Gehet hin jr vermaledeiten / vnnnd
wird sie wenig helffen/wie sie solche er-
schreckliche dinge vnbedacht in Wind
geschlagen/vnnnd veracht haben.

Vnd wie Paulus sagt/ das die gro-
se zukünfftige herrligkeit / so vbertreff-
lich sein werde / das sie izunder mit
menschlichen Herzen vnbegreiflich/
1. Corin: 2. Ist daraus leichtlich zuers-
messen/wie vnbegreiflich/ vnnnd izunz-
der mit Menschlicher Zungen / vnaus-
sprechlich gros vnd vber gros/ die qual
des ewigen Hellschen Feners sein wer-
de / welche als bald diesem wörtlein
wird folgen / vnnnd ewig werend ange-
hen / wenn es in iren Ohren / aus dem
Mund des Herren Christi wird erschals-
len/Ite, gehet hin/ etc.

Wie denn dieser Bestrenger / Ernst-
ster/ vnd den Gottlosen erschrecklicher
Richter/etlicher massen zum schrecken/
busß vnd besserung den bösen vnbusfer-
tigen fürbildet/ solche zukünfftige qual
vnd marter/ in dem verstorbenen reichē
Mann / vnd auch Salomon etwas dar-

¶ 5 VON

von saget im Buch der Weisheit am 5.
Cap: vnd spricht:

Im Buch der Weisheit/
Das fünffte Capitel.

A Es denn wird der Ge-
rechte stehen mit grosser
frewdigkeit wider die/ so
in geengstet haben/ vnd
so seine Arbeit verworffen haben.
Wenn dieselbigen/ denn solchs se-
hen/ werden sie grawsam erschre-
cken/ für solcher Seeligkeit / der sie
sich nicht versehen hetten/ vnd wer-
den vnternander reden mit rewe/
vnd für angst des Geists seufftzen/
Das ist der / welchen wir etwa für
ein Spot hatten / vnnd für ein hö-
nisch Beyspiel/ Wir Narrn/hielten
sein Leben für vnfinnig / vnnd sein
Ende für ein schande / Wie ist er nu
gezelet vnter die Kinder Gottes/
vnnd sein Erbe ist vnter den Heilig-
gen.

Darumb so haben wir des rech-
ten

ten weges gefeilet/vnnd das Liecht
der Gerechtigkeit hat vns nicht ges
schienen / vnnd die Sonne ist vns
nicht auffgangen/Wir haben eitel
vnrechte vnnd schedliche Wege ge
gangen/vnd haben gewandelt wü
ste vnwege / Aber des **W E R T**
Weg haben wir nicht gewust. Was
hilfft vns nu der prachte? Was brin
get vns nu der Reichthumb sampt
dem honuth? Es ist alles dahin ge
faren / wie ein Schatte / vnnd wie
ein Geschrey das für vber feret / wie
ein Schiff auff den Wasserwogen
dahin leufft/welches man/so es für
vber ist/keine spur finden kan / noch
desselbigen ban in der Flut. Oder
wie ein Vogel der durch die Lufft
fleuget/da man seines weges keine
spure finden kan/denn er regt vnnd
schlegt in die leichte Lufft / treibt
vnnd zutheilet sie mit seinen schwe
benden flügeln / vnnd darnach fin
det man kein zeichen solchs fluges
darinnen. Oder als wenn ein Pfeil
abgeschossen wird zum Ziel/ da die
zitheilete

zutheilte Luft bald wider zusam-
men felt / das man seinen Flug da-
durch nicht spüren kan.

Also auch wir / nach dem wir
geboren sind gewesen / haben wir
ein ende genomen / vnnd haben kein
zeichen der Tugend beweiset / Aber
in vnser bosheit sind wir verzeret.
Denn des Gottlosen hoffnung / ist
wie ein Staub vom Winde zer-
strewet / vnnd wie ein dünner Reif-
fe von einem sturm vertrieben / vnd
wie ein Rauch vom Winde ver-
wehd / vnnd wie man eines vergif-
set / der nur einen tag Gast gewesen
ist.

Darumb wil es nu in diesem Leben
heissen / Memorare Nouissima, solche
zukünfftige dinge nicht in Wind zu
schlagen / es wird aus schertz ein grosser
ernst werden / diese hendel wollen vnnd
sollen traun bedacht werdē auff beiden
seiten / Ein mal / was als da zukünfftig
sein werde / Zum andern / wie die ewige
qual zu vermeiden / vnd die ewig werens-
de freude zu erlangen / wer sich hie ver-
seumet /

seumet/der wirds in ewigkeit verseumet
haben/vnd wird als denn lachen zuuers
beissen sein/etc.

Das sey auch gnugsam von dem
dritten verstand dieses wörtlein anges
zeigt vnd gemeldet / wollen nu den
vierdten vnd letzten auch für vns ne
men / welches der H^{er} Christus auch
mit sonderlichem vleys vnd Worten ges
denckt/ Math: am 25. Cap: vnd sol
cher wort nicht vergeblich gebraucht/
sondern damit anzuzeigen / wie solche
legliche vnd endliche hendel izunder
in diesem leben / nur wol in acht zuha
ben vnd zu bedencfen / Er warnet vns
gnugsam für schaden / als ein gütiger
gnediger fromer Heyland / wenn war
nen nur helffen wil/ vnd sind dieß die
wort des Herrn/ vnd sie werden in die
ewige Pein gehen/ Aber die Gerechten
in das ewige leben/etc.

In diesen Worten wil vns der Herr
erinnern/zwey ding zubedencfen/ Erst
lich/was sich als denn/wenn die seligen
vnd verdampfen / noch gesprochenem
vrtheil / vom Richtstuel sich wenden
werden/vnd nu anfahen zu gehen / d^{er}
hin

hin sie zu gehen verurtheilet / was das
für ein gang sein werde / mit wasser vn-
ausprechlicher hertzen freude / oder
dargegen auch hertzen leide / er sich wer-
de anfahen mit wasser frolocken oder
betrübnis / sie die beine anffheben / auff
die füsse treten / vnd mit dem ersten
schritt solchen gang werden anfahen /
Vnd weil solches allen Menschen begeg-
nen wird / vnd nicht nach bleiben / wil
auch einem jedern insonderheit / daran
gros vnd viel gelegen sein / jr under in
diesem leben nach solchem gang den-
cken / wol zu gemüt vnd hertzen fassen.
Zum andern aber / wo solcher gang hins
gerichtet sey / das meldet der Herr
auch nicht on ursach / sondern der meis-
nung / vnd trewer warnung wegen / das
wir ja wol sollen betrachten / vnd aus
vnserm sinn vnd hertzen nicht kommen
lassen / wenn wir in diesem leben vnser
ren schritt gethan vnd volbracht ha-
ben / welche alle gezelet / jr maß vnd end
haben / vnd zum Todt eilen / im Todt
auffhören / was sich in dem zukünfftig-
gen leben für ein gang werde anfahen /
vnd wohin wir als dan gehen werden /
als

als nemlich / entweder zum ewigen leben / oder aber zur ewigen straff vnnnd pein / da vnser gehen vnnnd wandel kein auffhören / kein maß / ziel / noch end haben / sondern ein ewiger gang vnd wandel sein wird im ewigen leben / mit freuden / oder im ewigen Todt mit qual vnd hertzenleid.

Nu ist es an dem / das wir erstlich / wie der Vogel sein natürliche lust vnnnd lieb hat zu fliegen / also auch des Menschen freude stehet / im gehen vnnnd wandelen / von der Wiegen an / vnd da die leute nicht zuthun haben / mit arbeit vnnnd geschefften nicht beladen / das sie an einem ort sein vnnnd stil sitzen müssen / bezeuget es eines jeden Natur vnd eigenschafft / wie dem Menschen lieb vnnnd gefellig zu spacieren vnd zu gehen / vnnnd sich zu erlustigen allenthalben umbzusehen / dencket vnnnd trachtet auch ein jeder darnach / so viel im möglich / wie er müßig gehen / gute tage haben / vnnnd wie er wil / vnnnd wenn es im gefellig / möge spaciren / vnnnd wolten alle Menschen nach anleitung ihres Fleisch vnd Bluts / das sie nur lang leben /
ben /

ben/ oder auch wol gar in diesem leben
bleiben möchten/ vnd mit starcken ges
sunden beinen immer für vnd für möch
ten gehen.

Dargegen aber/ wer einem andern zu
gefallen vnd dienst gehen muß / oder
auch dahin gehen / do hin er nicht lust
hat/ wie sawer im solcher gang ankome
me/ vnd immer wünsche vnd begere/
das er solchen gang möge enden vnd
vollenden. Ist aber solcher gang gar
zum Kercker oder Todt vnd Galgen
gericht / darff nicht wort mit wasser
vnwillen/ trawrigkeit/ vnd hertzlichem
betrübniß solches geschehe.

Das ist aber nu nur kindisch gered/
von diesem zeitlichen gehen vnd wans
deln/ vnd gar nicht zuuergleichen/ mit
dem zukünfftigen gehen/ das sich anfas
hen / vnd nimmermehr enden wird/
entweder zu einem lustigen vnd freu
digen ewigen spaciren gehen vnd wans
deln / oder aber zum ewigen traurigen/
vnd am höchsten betrübten gang. Das
rumb ist es nu dem Herrn angelegen/
solches vns zu erinnern / das wir daran
sollen gedencen / vñ solche Nouissima,
letzte

letzte zukünfftige dinge wol zu gemüte
füren/das/wenn diß zeitlich gehen vnd
wandel sein end nimmet / was sich als
denn für ein gang werde anfahen/nim-
mermehr auffhörlich vnd endlich / vnd
darumb auch vnser thun vnd fürne-
men/nicht auff diesen zeitlichen wans-
del/sondern viel mehr auff den zukünfft-
tigen ewigen richten vnd wenden / vnd
darnach fürnemlich trachten / wie wir
als dan in ewiger freude / vnd ewiger
wollust/im ewigen Paradeis vnd Lust-
garten / mit dem Son Gottes selber/
mit allen Engeln vnd aufferwelten
spaciren gehen / vnd vns nimmermehr
auffhörlich erlöstigen werden. Darges-
gen aber mögen vermeiden vnd entflie-
hen/den hertzlich betrübten gang/ so in
der Helle im Hellschen Sewer/mitten
vnter allen Teuffeln / vnd anderen ver-
dampfen Gottlosen/zum ewigen Tod/
Qual vnd Pein sein wird / dahin wole
der Herr vnser sinn vnd gemüte gern
richten vnd wenden / das wir vns von
fleischlicher angeborner sicherheit/ auff
diese gedancken begeben / etc.

Solchs aber zubedencken/ stehet in
dem/

S

dem/

Dem/durch wasser mittel vñ wege wir jtz
under zu gewisser hoffnung solches ewi
gen frölichen gangs komen mögen/vnd
wie d' ander betrübtter abgang vñ Richte
stuel Christi zuuerhüten vñ zuuermeidē.

Dis aber wird vns nu im jzt gepre
digten wort zu hauff vñ hoff getragen/
vñ das für die füsse nidergelegt/darnach
vnserer liebe Großeltern geloffen/vnd ge
rand sind/an alle örtern Walfartē/Klo
stern vñ Ablass kirchen/viel gesucht vnd
nichts gefunden/viel gelt vnd gut dar
auff gewendet / aber vbel angeleget/gar
nichtes/od' aber böse ware dafür bekomē.

Nu aber sind wir Gott lob/ in dieser
begnadung Gottes/dz wie Paulus sagt
zun Römern am 10. Cap: prope est
verbū in ore tuo, vns alles für die augen
gestellet/sichtbarlich vnd greifflich ges
macht ist im jzt gepredigtē wort vñ Sa
cramentē/vñ reichlich alles angekündi
get wird vñ dargereicht/was vns zu ge
wisser hoffnūg solches frölichē gangs/
förderlich vñ dienstlich. Als nemlich/wie
er sagt: So du mit deinē Munde bekens
nest Jesum/dz er der Herr sey/vnd gley
best in deinē hertzen/das in Gott von dē
toden aufferweckt hat / so wirstu selig.

Das wird vns jzunder von grosser Gotes
gnaden geprediget/vñ teglich anges
kündiget zur seligkeit/vñ ewig werendē
frölichē gang/von dē Richtstul Christi/
Dz wir nu mit mund vñ hertzen/Christū
für vnsern Herrn vñ Heiland bekennen/
vñ mit Petro sagē/ou bist Christus der
Sondes lebendigē Gottes/vñ in solcher
erkenntnis vñ bekenntnis werdē erbawet/
auff dē starcken vñ unbeweglichen vnd
vnüberwindlichē felssen/vō den pforten
d Hellen/vñ eingeleibet der Kirchen Chri
sti/allē gleubigē vnd aufferwelten/vnd
sind albereit in hoffnūg cōciues sancto
rū domestici Dei, wie Paul: an ein an
dern ort saget: Mitbürger aller heiligen
vñ Gottes hauffgenossen/vñ warten in
frölicher hoffnūg auff den zukünfftigen
gang zū ewigen lebē / zu welchē vns für
gangē/Gottes vñ Maria Son/vñ weil
vns vnserē füsse vō Mutter leib an zum
tod vñ verdānis allein gefüret vñ geleis
tet/hat er dē ausgang vō seinē Vater ges
nomē/runter zu vns komē in vnser fleich
vñ blut/vnter vns sein wohnung vñ Ta
bernaculū Dei tui hominib. auffgeschla
gen voller gnad vñ warheit / mit seinen
füssen/

füssen / vns den Steg vnnnd Weg zum
ewigen frölichen gang bereitet / wie er
denn solchs von sich selbst redet vnd be-
zeuget / Ioan: am 2. Cap: vnd spricht:
Von nu an werdet ihr den Himmel of-
fen sehen / vnnnd die Engel Gottes hin-
auff vnnnd herab faren auff des Men-
schen Son / In welchen Worten den der
Herr sihet auff das Gesicht / so Jacob
der Patriarchen im traum fürkom-
men / wie eine Leiter vom Himmel rab-
bis auff die Erden rürend / gelehnet /
vnnnd die Engel daran auff vnd nider-
stiegen / das ist nu der Weg zum ewigen
Frewdē wege / super filiū hominis, vber
des Menschen Son / das wir in jm / vnd
durch in allein / den Himmel ersteigen /
vnd darumb nennet er sich auch / Ioan:
am 10. Cap: die Thüer zum leben / vnnnd
Ioan: am 14. Cap: sagt er / das er der
einige Weg sey / darauff man zum Vaz-
ter / vnd zum Ewigen leben komme.

Daran wil vns nu aber am höchsten
gelegen sein / das wir nicht allein diesen
Weg wissen / dauon hören leren vnnnd
predigen / denselbigen vns im wort vnd
Sacramenten mit fingern lassen zeigen
vnd

vnd weisen/sondern das wir auch darz
auff treten vnd gehen/ vnd wissen vns
auch in vnserm hertzen zu versichern/
das wir gewis vnd vbergewis darauff
wandelen/vnnd die rechten waren Pilz
gram vnd Wanderleute sein / wie denn
Petrus alle ware Christen also heisset
vnd nennet/vnd solche Christliche walz
farten vnd wanderung/auch vns ist für
gebildet / in der Historien im Andern
Buch Mosis am 12. Cap: da Gott lest
den Israelitern ansagen / wie sie das
Osterlemblein sollen essen / als nemlich
vnter andern eilend als Wanderleute/
die eilen vnnd immer fort reisen / aus
Aegypten ins gelobte Land / sollen sich
vmb ire Lenden gürtten / auffschürtzen/
die schuhe an füßen haben/ vnd den ste
cken in der Hand/ als Wanderleute/die
ein stück Brot in die Hand nemen/ auff
dem wege dauon essen / sich nicht eins
nider setzen/ sondern immer für vnd für
eilen/vnd von stadt gehen / als der eher
zu hauß vnd Hoff / Weib vnd Kinder
zu kommen / etc.

Das wir vns nu auch in dem wol
probiren/ob wir im Herrn Christo/ der

S 3 der

der Weg/Thür/vnd Pforten ist zum ewigen gelobten land/zu vnser ewigē be-
hausung vnd wonung/also leben vnd
wandeln/vnd do wir vns / als rechte
ware Pilgeram befinden / das wir ja
fortfaren/vnd nicht wie die Israeliter/
vns wider zu rück in Aegypten wendē/
aus begirde vnd lust der fleisch topf-
fe/Zwibel vnd Knobloch / nicht mit
Lotß Weib vns umbwenden / wider
nach Sodoma vnd Gomorra sehen/
zur Saltzsewel werden/ vnd gar dohin-
den bleiben/ vnd do wir ein mal die
Hand am pflug haben angeleget / nicht
zu rück schauen/vnd vns Gottes reichs
vnwürdig machen / wie Christus sagt/
Luce am 9. zu dem reichen / der jm wolt
nachfolgen/aber zuuor wider zu rück ke-
ren/vnd das seine zu Haus wolt bestel-
len.

Wie denn auch der heilig Apostel
Paulus / zu solcher warer vnd ernster
wanderung vnd wolfart vns zu ver-
manen/das erschreckliche Exempel der
Israeliter vns fürbildet / vnd spricht
zum Hebreern am 4. Capitel / So lasset
vns nu fürchten / das wir die verheiß-
sung

sung einzukomen zu seiner ruge / nicht
verseumen / vnd vnser keiner dahinden
bleibe / denn es ist vns auch verkündia
get / gleich wie jenen. Aber das Wort
der predigt halff jene nichts / da nicht
glaubeten / die so es höreten / denn wir
die wir glauben / gehen in die ruge / etc.

Do wir vns nu also befinden auff
diesem wege / für vnnd für reisend / als
rechte Pilgram / mögen wir vns im le
ben vnd sterben trösten vnnd frewen /
des zukünfftigen gangs / den wir vom
Stuel des H^{errn} Christi / mit allen he
ligen vnd auserwelten thun werden /
zum ewigen leben.

Wer aber nu also seiner sachen nicht
war nimpt / vom Herrn Christo / vom
wege vnd stege zur seeligkeit / viel vnnd
offt höret reden vnd sagen / aber dohin
den bleibet / vnd nicht eins auff diese reiz
se sich begiebet / sondern in Tobis krug
sitzend bleibet / issset vnd trincket / vnnd
dencket allein sein thun alhie anzuschla
gen / wie er hie in der herbergung mö
ge bleiben / vnnd gute tag haben /
das jzt angekündigte Reich Christi /
S 4 sein

sein Wort vnd Sacrament veracht vñ
hindan setzet / der mag auch das end
vnd den letzten gang bedencfen / wie/
vnd mit wasser hertze leid / er seinen ab-
schied vnd abgang vom Richtstuel des
H^{er}ren Christi werde nemen / vnd mö-
ge sich zur buß vnd waren bekeren ver-
ursachen lassen / das erschreckliche Ex-
empel der Israeliter in der Wüsten/
welches Paulus solchen leuten fürbil-
det / 1. Cor: 10.

Das ander wörtlein aber / das vns
Christus ja wol auch wil einbildē zube-
dencken / ist das wie er saget / In vitam
æternam, in supplicium æternum, das
sich beider gang werde richten vnd
wenden / entweder zum Ewigen leben/
oder zum Ewigen verdammis.

Vnd das ist das fürnehmste in dies-
sem gangen handel / was wir biß hieher
von diesem Spruch / Memorare Nouissi-
sima haben gesagt / das wir ja wol sol-
len bedencfen das end / warzu es allen
Menschen der mal eins wird kommen/
als nemlich zu solchen dingen / die es
wig ewig sein / vnd sein werden / das es
wig ewig wil vns der H^{er}re zugemüte
führen /

füren/alles was zeitlich vnd vergenglich/
das hat sein bescheid/ vnd ist nichts
zu rechnen gegen dem / was ewig/
das ewig / ewig / wil ernste gedancken
vnd nachdencken haben / was zu enden
ist/ vnd sein end nimpt / das leßt sich als
les thun vnd lassen / aber was sich nimmer
mehr endet / noch kan geendet
werden/ das wil wol bedacht vnd bez
rathschlaget sein/dahin mus man vor
sichtiglich vnd bedachtsam wandeln/
da man nicht kan umbkeren vnd zu
rück kommen / wie denn solchs zubes
dencken auch Christus einbildet / in der
erschrecklichen Gleichnus von dem
Reichen Mann / wie er in die Helle kom
men / nu nicht wider raus kan / was er
für ein wehe klagen füret/vnd was im
solch ewig/ewig/vor qual vnd hertzes
leid macht/da Abraham auff sein hertze
lich schreien/klagen/vnd ansuchen/ wie
im möge geholffen werden / wie er mög
ge zu rück kommen / im antwort vnd
spricht: Es ist zwischen vns vnd euch/
eine grosse klufft befestiget / das die da
wolten von hinnen hin ab faren zu
euch / kōndten nicht / vnd auch
§ 5 nicht

nicht von dannen zu vns herüber fa-
ren/etc.

Inzunder in diesem zeitlichen leben/
ist es Weltkindern nur vmb das zuthū/
was fleisch vnd blut gefellig vnd ange-
neme / darnach richtet jederman sein
thun vnd wesen / vnd lest sich ein jeder
düncken / er sey seiner sachen nur wol
vorgestanden / wenn er seine Schaffe
habe auffss drucken bracht / alle winckel
volle im Haus / vnd nirgend kein man-
gel / wie solchs David im 144. Psalm/
auch meldet / vnd von solchen vergebliz-
chen vornemen dieser leute redet. Darge-
gen auch hüten sich solche Weltkinder
für allen dem / was der natur zu wider /
fleisch vnd blut entgegen / was schaden
vnd betrübnis mage bringen / do brau-
chen sie zu ire vernunfft / weisheit vnd
die höchste vorsichtigkeit. Aber wie
vergeslich sie das ewige hindan setzen /
zu frewd oder traurigkeit gelangend /
das haben wir oben gemeldet / vñ giebet
es die tegliche erfahrung / vnd es ist auch
solchen leuten nicht zu rathen / noch zu
helffen / dencken nicht ehe zu rüch / als
wenn

wenn sie mit dem Reichen Man in die Helle/vnd der Hellen qual komen.

Aber nu solt es ja mehr angelegen ein/solchen Weltkindern zugedencken/an das/was iren Leib / Natur / Fleisch vnd Blut/ja auch ihrem hertzen zu wider sein wird/in dem ewigen brennenden Feuer/das nimmermehr wird ausleschen/vnnd das brennen vnd qual in selbigen Feuer am Leib vnnd im Hertzen/nicht eine kleine zeit/sondern ewig/ewig / für vnd für wird sein vnnd bleiben/das/das/solten sie izunder zur buß/besserung vnd solchem ewig werendem hertzen leid zu entfliehen/betrachten aus ihrem sinn vnnd gedancken nicht komen lassen.

Wenn sie aber mit dem Reichen Mann / die schantz haben versehen/vnnd in die Helle kommen sind / do wird Schreien / Klagen / Beten/vmb hülf vnnd errettung / aus solcher qual / vmb sonst vnnd vergebens sein / vnnd wird als dann das mit ihnen sich begeben vnd zutragen/wie die Mönichen für vnseren zeiten den
leuten

leuten/der Hellen schrecken vnd furcht
haben wollen einbilden / das die ver-
dampten im Hellschen Feuer / noch
sich in irer grösten Qual vnd langwir-
ger pein würden zu frieden geben/wenn
sie nur ein end vnd auffhören irer qual
hätten zu hoffen. Ja wenn solch auff-
hören irer pein / auch noch so lang sich
in die lenge solte verziehen vnd erstres-
cken/bis ein kleines Vöglein von einem
grossen Berg/der so gros als der ganze
Erdboden were / nur alle Jar ein klei-
nes Sandtkörnlein wegt füret / vnd sie
ires hertze leids / als denn solten ein end
wissen/ wenn solcher Berg / mit einzel-
lichen Körnlein gar wegt were getra-
gen. Aber solches wird von den Welt-
Kindern izunder in Wind vnd in ver-
achtung geschlagen / es wird aber dar-
umb nicht nachbleiben/vnd deswegen/
der HErr Christus sich an irer verdamm-
nis wil entschuldiget haben / vnd sich
in seinem gestrengen Gericht zu recht-
fertigen/vnd thut offte vnd viel mals
der Hellen/des ewigen Hellschen Feuer/
des Heulen vnd Seentlappern / ge-
dencken vnd melden/vnd sonderlich die
Parabel

Parabel oder Historien (wies etliche für ein wares geschicht halten) hat er mit sonderlichem vleis / Worten vnd allen vmbstenden / solchen vergessenen rohen Weltfrechen leuten / für die Augen gestellet / vom Reichen Mann / vnd dem armen Lazaro / vnd mit diesen Worten / wil er es jnen auch haben zugemüte gefüret / do er sagt / Tunc ibunt in supplicium æternum, vnd die verdampfen werden gehen in die ewige pein / Nota, Merck's eben / vnd male ein Sela oder Zendlein darzu / in æternum supplicium, in die ewige pein / nimme das wörtlein in acht / ewig / ewig / vnd laß dir rathen vnd helffen / weil zu helffen / vnd dir reiche hülffe vnd rath wird angeboten.

Was aber die Gottes Kinder belangend / hat jrent wege / der Herr Christus treulich vnd hertzlich gut meinend / auch diß wörtlein gebraucht / Iusti in vitam æternam, als denn werden die Gerechten gehen in das ewige leben / das sie jr hertz / gedancken / trost / vnd hoffnung sollen setzen auff ein ander leben nach diesem zeitlichen / welches ewig wird

wird sein/vnnd ewig weren/vnnd kein
Todt (welcher als denn ganz vnd gar
wird ausgetilget sein/wie Paulus sagt)
dasselbige wird abschneiden vnnd en-
den / wie er mit diesen vnsern jetzigen
leben thut jmer für vnd für würget vnd
mördet heut diesen / morgen einen an-
dern/vnd so bald einen Jungen als Al-
ten / etc.

Vnd do vnser natur fleisch vnd blut
lang zu leben im wünschet/do wir doch
in einem armen elenden leben sind / das
nichts ist/wie Moses im 90. Psal:sagt/
wens am besten ist / als mühe vnnd ar-
beit/wil der Herr die seinē eines andern/
bessern/ vnd ewigen lebens erinnern/dz
sie darnach dencken vnd trachten/ dar-
nach sich sehnen / vnd hertzlich verlan-
gen darnach haben / vnnd in solcher
hoffnung/alle zeitliche trübnis / die ges-
ringe / vnnd kaum eines augenblickst
lang zu achten/wie Paulus sagt / mit
gedult / vnnd trost der Schrift /in
hoffnung bald darauff ewig folgens
den lebens vberwinden vnnd ausste-
hen.

Was

Was aber das zukünfftige Leben
für ein ewig Freudereich vnnnd fro
locken des Leben sein werde / das leß
sich jetzunder mit Worten nicht reden /
mit der Feder nicht schreiben / Ja auch
mit gedanken nicht erreichen / denn
die aufferwelten / vnnnd GOTTES Kin
der / als denn das hören vnnnd sehen
werden / das jetzunder kein Auge
sihet / kein Ohr höret / vnnnd wer
den in ihrem Herzen / mit solcher
Freude vnnnd Herrlichkeit / vberschit
tet werden / welche jetzunder mit
Menschlichem Herzen nicht zubes
greiffen / vnnnd auszugründen / 1. Cor
intheorum 2.

Das sey gnug vom ersten Stück / wol
len das ander auch mit wenig Worten
nur melden vnnnd anziehen / was das
sey gesagt / vnnnd wie es zuuerstehen /
In aeternum non peccabis, das wer sol
che Nouissima, letzte ding bedenz
cket / nimmer mehr werde sündigen / do
es doch an dem / wie es Gottes Wort /
durch vnnnd durch bezeuget / das als
le Menschen Sündler sind / vnnnd
sündigen /

sündigen / auch der gerechte sieben mal
sündige / Ja auch Benefaciendo peccat,
wenn ers am besten macht / vnnnd alles
gutes thut vnnnd schaffet / one Sünde
solches nicht thue / vnd do jemand wolt
sagen / er hette keine Sünde / sagt Jo-
annes in seiner Epistel / so ist er ein lüg-
ner / vnd betreuget sich selbs / wie denn
auch der 13. Psalm sagt / das Gott von
Himmel herab schaw / ob er jemand Ge-
recht vnnnd from befinde auff Erden /
Aber vnter allen Menschen findet er
keinen / bis auff einen / vsque ad vnum,
das ist seinen geliebten Son / das vnbe-
flechte Lemblein / den Samen des Weis-
bes entpfangen vom heiligen Geist /
vnd nicht aus sündlichem Samen ent-
fangen vnnnd geborn / wie alle andere
Adams Kinder / Psalm 51.

Darumb müssen auch die Gerech-
ten / die aller fürnembsten für Gott /
vnd ware Gottes Kinder als Sünder /
die sünd haben bey sich befunden erken-
nen / vnnnd bekennen inmer für vnd für /
alle tage / bitten vmb vergebung der
Sünden / vnnnd müssen sich mit Petro
des teglichen Fußbadts Christi erge-
ben /



ben / wollen sie anders mit theil habens
im Reich Christi / vnd darumb ist auch
das Reich Christi ein Gnadenreich /
Regnum regnantis gratia, vnd Abun-
dantis Gratia, darinnen immer vnd
vnauffhörlich die Gnad regieret / vnd
wo grosse Sünde / do als grössere gnad
Rom: 5.

Das nu deswegen diese wort / Me-
morare nouissima, & in æternum non
peccabis, nicht sein zuuerstehen / das sol-
che leute / welche der letzten dinge sich
vleißig vnd immer erinnern / gar nicht
sündigen / gar keine Sünde haben / von
wegen solcher betrachtung / dem dieser
verstand were wider die ganze heilige
Schrift / sondern mit der Schrift / vñ
aus der Schrift / ist diß dieser Wort
verstand.

Erstlich das die Gerechten / so sich
immer der letzten dinge erinnern / in
Gottes furcht vnd lieb leben / vnd im
Herrn Christo suchen / von ihm nemen
vnd entpfangen / was er / als vom Vas-
ter darzu gesandt / aus reicher milder
Gnade / jnen teglich darreichet / giebet
vnd schencket zu ablehnung vnd verhüs-
tung

G

tung

tung aller der erschrecklichen dinge / so
sich endlich vnnnd letztlich werden zutras-
gen / wie solchs oben nach der lenge / in
vierley verstand angezeiget vnnnd erklez-
ret / vnnnd dargegen im H^{er}ren Christo /
der ewigen Seeligkeit / vnd aller frewd
vnnnd herrligkeit / so darinnen sein wird /
versichert vnnnd vorgewissert werden /
das dieselbigen nicht oder nimmermehr
sündigen / das ist / wie der Apostel saget /
peccatum ad mortem, das sie nicht /
wie die anderen rohen / vergessenen
Leute Gottes vnnnd seines Worts
verechter / welche wie die vnuernünfft-
tigen Thier / nur auff dis zeitlich Lea-
ben sehen vnnnd dencken / vnnnd alles
zukünfftiges zu rück setzen / weder
GOTT / noch an den Teuffel / wes-
der an den Himmel / oder an die Hel-
le gedencen / in Sünden empfangen /
darinnen geborn / in Sünden le-
ben / vnnnd one derselbigen erkenntnis /
Buß vnnnd ablehnung / darinnen bes-
harren / vnd endtlich sterben / sondern
in stetem erkennen vnnnd bekennen ihrer
Sünde / derselbigen vergebung vnnnd
ablenung /

ablenung / vnd Gnad bey Gott im
H/Ern Christo suchen / bitten / vnd bes
geren / vnd mit vnaußhörlichem seuffz
gen ruffen vnd schreien / wie David
von ihm vnd allen Gottes Kindern
sagt / Tibi sum peccatum, tibi pecco,
dixi confitebor: pro hac orabit ad te
omnis sanctus Anxius ero pro pecca
tis meis. Ach H/ERX laß Gnad
sein / Abba lieber Vater / vergieb
Sünd vnd Missethat / sey du ja fröma
mer als wir sein / gehe nicht mit vns
ins Gericht / straffe vns nicht in deis
nem Zorn / bey vns ist nichts denn
Sünde / Können auch nicht mehr
als sündigen / Das heist nun In æter
num non peccare, nimmer mehr sün
digen / in stetem Büßen / Beichten von
der Tauff an / sich zum Beichtstuel /
zum Wort vnd Sacrament halten /
darinnen dan die Sünde vergeben /
vergessen / in die tieffe des Meers ges
worffen / vnd nimmer mehr gedacht
wird / das sein Gottes Sünder / das
heist David / Tibi pecco, solche leute die
Gott sündigen / vnd dem Gott / der in

frer schwachheit seine stercke beweiset/
vnd mehr gnad hat / als sie sünde / vnd
vberflüssige gnade / 2. Cor: 12. vnd sol-
che Sünder heissen / Beati quorum, sagt
David im 33. Psalm / Gottselige leute /
welche Gott in steter vergebung ihrer
Sünde / mit Gnad vnd Barmherzigs-
keit krönet / ihnen ihre Sünde vergibet /
vnd nicht zu rechnet / ein solcher Sün-
der ist David / vnd darff darumb mit
frewdigem hertzen sagen / im 85. Psalm /
Custodi animam meam, quoniam san-
ctus sum, **H**err beware meine Seele /
denn ich bin heylig / vnd der Apostel
Paulus / wenn er zu solchen Sündern
schreibet / giebet er ihnen diesen rühms-
lichen vnd herrlichen Titel vnd sprichet
Vocatis sanctis, den heiligen zu Rom /
zu Corint: etc.

Vnd solche Sünder / heisset Paulus
auch zum Ephe: am 5. Cap: die gemein-
ne Christi / die heilig / herrlich / vnd kei-
nen flecken oder runzel hat.

Zum andern / sagt Johannes in sei-
ner ersten Epistel am 3. Cap: das alle
die so aus Gott geboren sind / nicht
sündigen / denn Gottes Same bleibe
bey

bey ihnen/vnd können nicht sündigen/
denn sie sind von Gott geboren / Ein
mal können solche Gottes Kinder / aus
Gott geboren nicht sündigen / sprichet
Johannes darumb / das sie aus Gott
geboren sind/zum andern/ das der Saa
me Gottes in ihnen bleibe / welches
zweierley weis kan verstanden vnd
ausgeleget werden / was Johannes
heist nicht sündigen/ Ein mal/ das die/
so aus Gott geboren / nicht sündigen/
nicht das sie nicht Sünde haben / oder
auch nicht viel vnd offemal strauch
eln vnd fallen / weil der Gerechte auch
sieben mal felt / wie oben erkleret / sone
dern nicht sündigen / wil Johannes
heissen/wie oben nach der lenge gemel
det / das Gott den seinen / so in steter
warer Buß/ erkenntnis vnd bekenntnis
ihrer Sünde / als bald sie gefallen / an
Herrn Christo sich wieder auffheben/
durch Christum im Glauben verges
bung ihrer Sünde bitten / solche Sün
de zum verdammis nicht zu rechnet/vnd
in solcher steter vergebung irer Sünde/
für Gott sein geacht vnd gehalten
werden / als hetten sie niemals gesün
diget/

get/sind also Gottes Sünder / die vnder dem gnaden Himmel sündigen/vnd wie sie aus schwachheit vnd nicht mutwillig / vnd gantzlich vorsezlich sündigen / Gott stehen vnd fallen / als Kinder für Gott / als für ihrem Vater/einen Fussfall thun / dem Vater in die Schoß lauffen / vnd Gnad bitten/ auch bey Gott ein Vater hertz finden / vnd teglich zu veterlicher Gnad angenommen werden/vnd bey Gott/ sie als Kinder / vnd Gott Vater/ für fromme Gnaden Kinder / gehalten werden/vnd sind nu eben solche Leute / welche in betrachtung der letzten dinge / mit bussfertigen Leben / sich also in die sache schicken / das sie alles was letztlich vnd endlich mag fürfallen zum bösen / zum verderben vnd verdammis/ fliehen vnd meiden / vnd im H. Ern Christo sich der ewigen seligkeit/ durch stete ablenung ihrer Sünde/Gottes zorn / vnd ewige vermaledeung versichern vnd vergewissern/das wil nu Joannes / nach oberzelter meinung/ nicht sündigen heissen.

Sür

Sür das ander aber / heist in æter-
num non peccare, nimmer mehr sün-
digen / das solche Gottes Kinder / so
in vleissiger betrachtung / solcher offts
gemelter letzten dinge / in Gottes furcht
leben vñd wandeln / vñd weil sie aus
Gott sind geborn / von oben herab / nu
eine newe Creatur worden / das sie auch
nach dem newen Menschen / nicht sün-
digen / sondern in ihrem Herzen also
new geborn / lust vñd lieb haben zu al-
lem guten / der Sünd aber feind vñd
gram sind / wider die Sünde im Geist
streiten vñd kempffen / vñd ist ihnen
hertzlich leid / vñd zu wider / wo sie im
Fleisch mit Sünden vberleitet vñd ge-
fallen sind / vñd wolten von hertzen /
wenn es sein köndte / das sie nimmer
mehr sündigen möchten / wie denn auch
der liebe Paulus / solchs hertzlich bit-
tet / vñd von dem H. Ern Christo bes-
geret / 2. Corinth: am 12. Cap: vñd
zun Römern am 7. Capitel / Klaget
er mit ernsten Worten vber sein eigen
fleisch / vñd spricht: Ich thue nicht das
ich wil / sondern dz ich hasse das thu ich /
G 4 Ich

Ich weis das in mir / das ist in meinem
Fleische / wonet nichts guts / wollen ha
be ich wol / aber volbringen das gute /
finde ich nicht / denn das gute das ich
wil / das thu ich nicht / sondern das bö
se / das ich nicht wil / das thu ich. Ich
habe lust an Gottes Gesetz / nach dem
inwendigen Menschen / Ach ich elender
Mensch / wer wird mich erlösen von
dem Leibe dieses Todts / Ich dancke
Gott / durch Ihesum Christum unsern
Herrn / So diene ich nu mit dē gemüte
dem Gesetz Gottes / aber mit dem Fleis
sche dem Gesetz der Sünden / etc.

Das nennet nu hie Paulus / in æter
num non peccare, nimmer mehr sündi
gen / das solche Gotteskinder / aus Gott
geborn / nach dem innerlichen neuen
Menschen / nu nicht mehr / wie zuvor
lust vnd lieb haben zur Sünde / sondern
zum guten / vnd haben ihre freude im
Gesetz Gottes / alles zu thun / was nur
Gott wolgefellig vnd haben wil / vnd
er gleich ihnen nach mehr gebot / als in
allen Gesetzen geschrieben / aufferleget /
sind sie mit hertzlicher lust vnd lieb /
willig vnd freudig / alles zu thun vnd
zuuolbring

zuuolbringen / denn sie sind nu aus Gott
geborn / eine newe Creatur von oben
rab / Conditi in Christo Iesu, ad opera
bona, sagt Paulus zum Ephe: am 2.
Cap: Im Herrn Christo geschaffen zu
guten wercken / vnd sie sind Germen
splantationis meæ, opus manus meæ ad
glorificandum, sagt Gott im Esa: am
60. Cap: Zweige meiner pflanzung/
vnd ein werck meiner Hende zum preis/
Arbores Iustitiæ, sagt der Prophet an
einem andern ort / seine liebliche junge
Zweiglein / von Gott auff's new ge
pflanzet vnd geschaffen / zur Gerech
tigkeit / vnd wie Jeremia am 31. stehet/
hat Gott sein Gesetz in ihr Hertz ge
geben / vnd in ihren sinn geschrieben / das
sie on alles eusserlich gesetzlich dringen
zwingen vnd nötigen / von inwendig
rauß / vnd aus grund ires Herten / lust
vnd lieb haben zu Gottes Gesetz / vnd
wie Paulus sagt zum Römern am 5.
Cap: Diffusa est charitas Dei, ist die lie
be Gottes in jren Herten ausgegossen/
durch den heiligen Geist / vnd zum Gal
latern am 4. nennet er solche Gottes
Kinder / filios liberae, Kinder der freien/
G 5 welche

welche nicht wie die Kinder der Magd
alles thun/was inen zu thun befohlen/
Knechtischer weis/ mit vnlust vnd vn-
willen/aus drang not/ vnd zwang/son-
dern mit kindlichem freien willigem
hertzen/ mit lust / lieb / vnd wolgefal-
len / vnd zum Römern am siebenden
Capitel sagt er/das solche Gottes Kin-
der von oben rab / aus Gott geborn/
nu dienen im newen wesen des Geis-
tes / vnd nicht im alten wesen / des
Buchstabens.

Vnd darumb sagt auch Johannes/
am oben gemelten ort / das solche aus
Gott geborne Kinder/nicht allein nicht
sündigen/sondern auch non potest pec-
care, quia semen Dei manet in eo, nicht
können sündigen / darumb das Gottes
samen bey inen bleibet/ vnd das sie von
Gott geborn sind / Vnd das ist aber nu
Gottes Samen/ vnd das Gott in sol-
chen Gottes Kindern bleibet/nach dem
newen Menschen / wie derselbige von
oben rab / vnd wie Petrus sagt/nicht
aus vergänglichem/sondern aus vnuer-
gänglichem samen/nemlich aus dem leb-
bendigen

bendigen wort Gottes/das da ewiglich
bleibet/ geborn ist/Nach dē alten men-
schen aber sagt Ioan: am 1. Cap: darff
kein heiliger sagen / das er keine Sünde
habe/vñ niemals habe gesündigtet/sagt
ers aber/so verführet er sich selbst / vñnd
die warheit ist nicht in jm/macht Gott
zum lügner / vñnd sein wort ist nicht in
jm/wie denn auch Paulus solches von
jm saget/zun Römern am 7. Cap:Men-
te seruiio legi Dei, Carne uero legi pec-
cati,das er mit dem gemüte diene dem
Gesetz Gottes / aber mit dem Fleisch/
dem Gesetze der Sünden.

Das sey nu auch von diesem andern
stück gesaget / dabey wir es nu wollen
bleiben lassen/ vñnd hiemit enden/Gott
aber aller Barmhertzigkeit von hertzen
bieten dz er vnser hertze dermassen wol-
le in seinē jzt gepredigten wort erleuch-
ten/vñnd durch seinen heiligen Geist/
vns regieren vñnd führen / das wir sol-
che Nouissima , letzte dinge nimmer
mehr aus vnserem sinn / Hertz / vñnd
gedancken kommen lassen / vñnd der-
massen vns in dem jzt scheinenden
Licht

Liecht/in die sach schicken / das wir im
Liecht wandeln / Kinder des Liechts
sein/vnd alles vnglück/betrübniß / vnd
zukünfftigen herze leid / im **H**errn
Christo benommen / aller zukünfftiger
frewd vnd herrligkeit / in gewisser vnd
vngeweißelter hoffnung gewarten /
in solcher hoffnung frölich leben vnd
sterben/ das verleihe vnd gebe vns/ der
getrewe gnedige vnd gütiger Gott/
durch Ihesum Christum seinen lieben
Son vnsern Herrn vnd Heiland Amen.

Gebet aus dem 90. Psalm.

Herr Gott vnser Heiland/
lass vnser Gebet für dich kom
men/vnd neige deine Ohren
zu vnserm seufftzen/**A**ch **H**err der
du die Menschen leffest sterben/vnd
sprichst / Kompt wider Menschen
Kinder/ gedencke wie kurtz vnser le
ben ist/vnd niemand der da lebet/
vnd den Todt nicht sibet / der seine
Seele könne erretten / aus des To
des banden/**D**u leffest sie dahin fa
ren

ten wie einen Stram / vnd sind wie
ein Schlaff / gleich wie ein Grass
das doch bald welck wird / das da
frühe blühet / vnd bald welck wird /
vnd verdorret / Das machet dein
Zorn / das wir so vergehen / vnd dein
Grim / das wir so plötzliche dahin
müssen / Denn vnser missethat stels
lest du für dich / vnser erkandte Sün
de ins Liecht für deinem Angesich
te / Darumb fahren alle vnser tage
dahin / durch deinen Zorn / wir brin
gen vnser Jar zu wie ein geschwetz /
vnser leben wehret siebentzig Jar /
vnd wenns hoch kömpt / so finds
achtzig Jar / vnd wenns köstlich
gewesen ist / so ist mühe vnd arbeit
gewesen / denn es fehret schnell da
hin / als flögen wir dauon / wer glu
bets aber / das du so sehr zörnest / vñ
wer fürcht sich für solchem deinem
Grim ? Ach **HERR** lere vns beden
cken / das wir sterben müssen / auff
das wir klug werden. **HERR** lere
dich wider zu vns / vnd sey vns gne
dig / fülle vns frühe mit deiner gna
de / so

de / so wollen wir rhümen vnd frö-
lich sein vnser lebenlang / **H**err wir
hoffen auff dich / denn du bist ja vn-
ser **G**ott / vnser zeit stehet in deinen
henden / las dein Antlitz vber vns
leuchten / hilff vns durch deine gü-
te / las vns nicht zu schanden wer-
den / vnd im **T**odt entschlaffen / lere
vns doch / das ein ende mit vns has-
ben mus / Vnd vnser Leben ein ziel
hat / vnd wir alle danon müssen / vn-
ser tage sind einer handtbreit bey
dir / vnd vnser leben ist wie nichts
für dir / Ach **H**err wie gar nichts
sind alle Menschen / die doch so gar
sicher leben / sie gehen daher wie ein
schein / vnd machen inen viel vergeb-
licher vnruhe / sie sammeln / vnd wis-
sen nicht wer es kriegen wird / aber
wir trösten vns deiner gnad vnd gü-
te / wir hoffen auff dich / errette
vns von allen vnsern **S**ün-
den / so wollen wir in dir
frölich leben / vnd sel-
liglich sterben /
Amen.

Bedruckt zu
Francfurt an der O,
der / durch Johan
Eichorn.

1572.

Geometrie

von Simon Stevin

1685

Leipzig

1275

80

~~V d~~
~~20~~

40¹⁹
2, 28

X 2200 873

Sbr







Inches 1 2 3 4 5 6 7 8

Centimetres 1 2 3 4 5 6 7 8

Farbkarte #13 **B.I.G.**

Blue	Cyan	Green	Yellow	Red	Magenta	White	3/Color	Black
Light Blue	Light Cyan	Light Green	Light Yellow	Light Red	Light Magenta	White	Light Gray	Black
Dark Blue	Dark Cyan	Dark Green	Dark Yellow	Dark Red	Dark Magenta	White	Dark Gray	Black